

هكذا تكلم علي بابا

نبيل راجب



الهيئة المصرية العامة للكتاب
١٩٩٦

المسرح العربي (١٠٤)

ديسمبر ١٩٩٦

هكذا تكلم علي بابا

المسرح

سلسلة شهرية

تصدر عن

الهيئة المصرية

العامّة للكتاب

رئيس مجلس الإدارة

د. د. سمير سرخان

رئيس التحرير

د. نادية البنهاوى

سكرتير التحرير

جوده رفاعى

الإخراج الفنى

فاتن رضا

المغلاف للفنان : يوسف شاكى

الشخصيات

الشباب : هو شاب مثل كل الشباب • لا يهم أن نعرف اسمه • قلق ومتوتر في بحثه عن الحقيقة بأى ثمن •

الأستاذ رعد : مدير إدارة عموم رفع الستار • ضخم الجثة • عصبي • شاعر بأهميته • مؤمن إيمانا أعمى بالتكنولوجيا التى تعد الموضوع الوحيد الذى يسهب فى الحديث عنه ، ومع ذلك فتفكيره بيروقراطى وافقه ضيق • عمره خمسون عاما •

السيد نجم : رجل أعمال ناجح من الذين كونوا ثروة طائلة فى زمن قياسي • يرى فى المسرح مجرد تسلية ومتعة يجدد بها نشاطه للحصول على المزيد من الثروة • وغالبا ما يتردد عليه مع سكرتيرته الحسناء ثريا • تجاوز الخمسين من عمره •

الأستاذ رشيد الساكت : ناقد مسرحى مخضرم • يرى فى المسرح مجرد نجومية ودعاية وضجة بلا أى مضمون
فكرى • عاصر يوسف وهبى والريحانى
والكسار وغيرهم • لا يزال تفكيره بنفس
السطحية • يعشق مغازلة الفتيات الصغيرات •
تجاوز الستين من عمره •

على عليوة : ابن بلد • يفهمها وهى طائفة • لا فرق عنده
بين السرقة والنهيب ، بين الانفتاح
والاستثمار • مارس كل الحرف وفى السنوات
الأخيرة كون ثروة لا يستطيع أن يحصرها
برغم أميته • تجاوز الأربعين بقليل •

ناجى ونهلة : طالبان فى المعهد العالى للفنون المسرحية •
يريان فى المسرح رسالة مقدسة • ثائران
ضد المسرح التجارى والقطاع الخاص الذى
أهدر قيمة المسرح فى نظر الجمهور • رافضان
لكل النماذج الموجودة معهما فى المسرح وعلى
رأسها نجم بك ورشيد الساكت • فى حوالى
العشرين من عمرهما •

مدام شويكار : عجوز متصابية تدعى نسبتها الى الأتراك •
تحاول أن تلقى بشباكها حول على عليوة
بهدف الزواج منه •

شخصيات أخرى : فرق موسيقية للجاز - كهربائى - بلاسيه -
بائع مياه غازية وشيكولاته ، وكومبارس -
ساحر يقدم العابه - فريق باليه راقص -
خبراء أجانب فى رفع الستار •

المنظر

المنظر لا يتغير في الفصلين . الأحداث تدور في قاعة المسرح أكثر من دوراتها على منصته المخفية خلف الستار المغلق . الكواليس في هذه المسرحية تقع بين المنصة وبين البناوير على اليسار واليمين . في البناوير الأول على اليمين يجلس نجم بك وسكرتيرته الحسناء ثريا . وفي الثاني رشيد الساكت وناجي ونهلة . أما البناوير الأول على اليسار فيجلس فيه على علوية ومدام شويكار .

المساحة بين المنصة والصف الأول في القاعة فسيحة بحيث تسمح لتقديم عروض سحرية واستعراضات راقصة يمكن أن تنتقل بينها وبين المساحة الخالية من المنصة أمام الستار صعودا وهبوطا .

على يمين هذه المساحة أمام البناوير تعسكر فرقة الجاز المكونة من أربعة عازفين على أكثر تقدير بمن فيهم المايسترو .

فى الصف الأول ىجلس شاب غاهض ىتحرك فى عصبية ، والى
جواره رجل عجوز ىغط فى نومه وشخيره بمجرد جلوسه .

ولابد أن ىتحلى الممثلون بسرعة البديهة واليقظة الكاملة حتى
يمكنهم توظيف احتكاكهم بالجمهور سواء على مستوى الحوار
أو الحركة إذ أن صالة المسرح هى الأرض التى ستدور عليها
معظم الأحداث والمواقف التى لن تنتقل الى داخل المنصة الا بعد
بداية الفصل الثانى ، ومع ذلك فالعلاقة عضوية بين الصالة
والمنصة من بداية العرض حتى نهايته .

الفصل الأول

الستار مغلق • فرقة الجاز تعزف قطعة موسيقية مثيرة
للأعصاب بصوت يدوي في الأذان • يدخل البلاسيه من الكواليس
اليمن وهو يسند الرجل العجوز ذا الطربوش ثم يجلسه بمتنهى
الرفق في منتصف الصف الأول • يظل العجوز يبحث في جيوبه كلها
في حين يقف البلاسيه في انتظار البقشيش ، وعندما يطول انتظاره
يتحرك خطوتين الى الخلف •

العجوز : استنى يا بنى .. مش عارف هم راحوا فين ؟ !
البلاسيه : (بأدب شديد) معلىش يا فندم .. كفاية تشريف
سيادتك !

(يظل العجوز يبحث دون جدوى فيتراجع البلاسيه
حتى يخرج من الكواليس اليمن • يظل العجوز
يدقق النظر بحثا عنه وعندما لا يجده ينام في مقعده
ويعلو شخيره)

(يعود البلاسيه ومعه شاب طويل ، نحيل ، غامض ، يجلس على مقعده بمجرد أن يشير البلاسيه اليه ، ولا ينظر في أى اتجاه • فيفقد البلاسيه الأمل في البقشيش ويتراجع ليختفى في الكواليس اليمين)

(يفتح باب البثوار الثانى على اليمين ويدخل ناجى ونهلة ويجلسان)

ناجى : أنا مش عارف انتى ليه مصرّة يا نهلة اننا نشوف المسرحية الهايفة دى •• انتى عارفة أنا ضد المسرح التجارى اللى ما يهدوش غير المكسب •• (بسخرية) هكذا تكلم على بابا !! حايتركلم حايقول ايه يعنى ؟؟ شوية كلام فارغ وتخاريف •

نهلة : احنا بحكم اننا طلبة فى بكالوريوس المعهد العالى للفنون المسرحية •• لازم نطلع على كل اللى بيدور فى الحركة المسرحية •

ناجى : ده اذا كان فيه حركة مسرحية أصلا !!

نهلة : أمال احنا دخلنا المعهد ليه ؟ !

ناجى : عشان نعمل الحركة دى !! مش نتفرج على الهلس!!

نهلة : لازم نشوف الهلس عشان ما نعملوش •

(فى نفس الأثناء يدخل نجم بك وسكرتيرته الحسناء ثريا ليجلسا فى البثوار الأول على اليمين حيث يقف خلفهما البلاسيه • يمد نجم بك يده فى يد البلاسيه)

نجم : (بصوت عال) خذ ده علشانك .. أنا أعرف أقدر
كويس الناس اللي بيخدموني .. ولا ايه يا ثريا ؟!

ثريا : ودي عاوزه كلام .. خيك مفرق الجميع من راسهم
لرجليهم .

(البلاسيه يرفع يده بالتحية وينصرف)

نجم : لو كسبنا الصفقة بتاعة الليلة دي يا ثريا ..
حا أحلى بق كل اللي في المسرح .

ثريا : (تفحك بدلال متسائلة) وبقي أنا ما يستاهلش
الحلاوة ؟ !

نجم : ده انتي الحلاوة نفسها .. من نهار ما اشتغلتى
سكرتيرتى والحلاوة كلها نازلة ترف على لحد
ما بقيت ملزق !

ثريا : (بنفس الفحكة ذات الدلال) حلاوتك يا نجم بك !
(فى البوار الثانى الملاصق للأول)

ناجى : (لثملة) سامعة ؟ !

نهلة : وماله .. كلها خيرة مسرحية ؟ !

(يفتح باب البوار الثانى ويدخل رشيد الساكت
ليجلس تقريبا بينهما ، وينظر اليهما بتكبر لكن ناجى
يفاجئه)

ناجى : الأستاذ رشيد الساكت المحرر الفنى ؟ !

رشيد : الناقد الفنى من فضلك !

نهيلة : أهلا وسهلا .. دى فرصة سعيدة جدا .. أنا نهيلة
عبد الكريم (ثم تشير لناجى) وناجى أحمد ..
زملاء فى بكالوريوس معهد الفنون المسرحية .

وشسيد : (شاعرا بمنتهى الأهمية) أهلا وسهلا .. طبعاً
بتقروا مقالاتى الولة فى المسرح والسينما والتليفزيون
والرقص والغناء والتمثيل والاستعراض وخلافه ..
حكم أنا ما باعتقش .. أربعين سنة نقد فنى .

نهيلة : طبعاً .. طبعاً .. ربنا يديك طولة العمر !

(فى تلك الأثناء يدخل على عليوة فى البنوار الأول
على اليسار وقبل أن يجلس بمنح البلاسيه بقشيشا
ويسأله)

على : المسرحية فيها رقص ؟

البلاسيه : (بادب) والله ما أعرفش يافندم !! حرام اكذب
واقولك فيها رقص ويطلع مافيهاش .. ولا أقولك
مافيهاش ويطلع فيها .. تبقى حاجة بايخة !!

على : تبقى بتشتغل فى المسرح وماتعرفش اللى بيجرى
فيه ؟ !

البلاسيه : أصل الليلة دى .. هى ليلة الافتتاح يا بيه !

على : تعرف اذا ماطلعش فيها رقص .. حا أطربق المسرح
على دماغات صحابه .. مش يبقى دافعين فى الكسكرة
ميت أهيف ولا نكلش عينينا برقاصة !!

البلاسيه : (وهو يسحب فى أدب) ان شاء الله كل خير يا سيد !
مافيش حاجة تغلى عليك .

(ينهض الشاب الصامت القلق الغامض الجالس في
الصف الأول ويظل يلذع المساحة بين الصف الأول
والمنصة جيئة وذهابا ، ولا يلتفت حتى للفرقة
الموسيقية التي تملأ المنصة ضجيجا بين الحين
والآخر)

(يفتح البنوار الأول على اليسار وتدخل مدام
شويكار التي يصعق على عليوة لزيئتها المتبرجة التي
تحاول بها اخفاء حقيقة سنّها • تنظر الى الملابس
البلدية التي يرتديها على فتظهر بعض التأفف ومع
ذلك تجلس)

شويكار : بون سوار •

علي : (يفسح مقعده بعيدا عن مقعدها) مساء الخير
(ينظر تجاه الباب) أمال فين البيه ؟ ! أنا خايف
حد ييجي ياخذ المطرحين دول ؟ !

شويكار : (بمنتهى الاستقرابية) بيه مين يا انت ؟ !

علي : (محتجا) قصدى السيد جوزك !

شويكار : أنا من غير جوز ! (مستدركة) ثم ليه الأسئلة
الخصوصى دى ؟ ! حاجة غريبة يا اخى !

علي : ياست دى ماكانتش كلمة •• خلاص •• اتكلمنا
(يضع يده على فمه)

شويكار : أنا مش باقولك ماتتكلمش •• لا •• اتكلم •• بس
بلاش المسائل الخصوصية بتاعى •• أحسن أنا
باتكسف خالص •• صحيح أنا مش صغيرة وعارفة
الدنيا كويس •• لكن مش كبيرة كمان •• وعشان

كده كل واحد يحاول يتكلم معايا في المسائل
الخصوصى بتاعتى... أغرق على طول في شبر ميه ...
أظن انت فاهمنى كويس !!

على : والله ما أنا فاهم حاجة خالص !

شويكار : آمال فين المدام بتاعتك ؟ !

على : المدام ؟ (ضاحكا بصوت عال) احنا ماعندناش
مدامات ... احنا عندنا حريمات ... والحريمات
مش ممكن يعتبروا المرسح !

شويكار : عندك كام م الحريمات ؟

على : ثلاثة يسدوا عين الشمس !

شويكار : ياي ... سوفاج !!

على : ماله السوفاش ... مافيش اجمل من النوم عليه وهو
دافى فوق القرن في الشتا !!

شويكار : ياي ... انت بتتكلم على ايه ؟ !

على : عندك حق ... دلوقتى التلات بيوت تبعنا كلها تكييف
وتلاجات وفيديو كاساتا والذي منه .

شويكار : ياي ... مش معقول ... اسمه الفيديو بال V

يا انت ... وكاسيت مش كاساتا يا انت ...
بالمنااسبة انت اسمك ايه ؟ !

على : محسوبك على عليوة ... وشهرتى في الحنة
على بابا !!

شويكار : باى ٠٠ تجنن ٠٠ مش ممكن ٠٠ زى على بابا بتاع
المفارة ؟ !

على : عشان اصحابى لما لقونى اتغنيت وربنا فتح عليا
فى اربع خمس سنين ٠٠ قالوا انا لقيت مفارة
على بابا !!

شويكار : (يغث) وصحيح انت لقيت المفارة ؟

على : مفارة ايه ياست ؟ ! فى الزمن ده المفارات بقت
مخبأ لتجار المخدرات ٠٠ لكن احنا فشر ٠٠ احنا
بنكسب من عرق جبيننا ٠٠ بس المهم تفتيح المخ .

شويكار : واااى بتفتح مخك يا على بابا ؟ !

على : افهمها وهى طيارة ؟ ! وانط ع الفالحة ٠٠ ابص
الاقى الأرنب بقى اتنين من غير ما ادرى ٠٠ يعنى
بصراحة كده دلوقت انا ما أعرفش عندى كام
أرنب !!

شويكار : آه فهمت ٠٠ انت بيع أرنب !

على : أرنب ايه ياست ؟ ! الأرنب يعنى مليون !

شويكار : مليون ايه ؟ !

على : مليون جنيه !! حا يكون مليون ايه يعنى ؟ !

شويكار : (تدق على صدرها فى شهقة) ده على كده ٠٠
على بابا الحقيقى ببقى شحات بقى ؟ !

على : فى عين العدو ! وعشان كده انا جيت المرسح ده

عشان أشوف على بابا حايقول ايه ؟ ! حايتكلم صح
ولا غلط ؟ !

شويكار : ده أنا قاعدة بقى مع بطل المسرحية وأنا مش ذريانة
(تضحك) .

(يمر بائع المربطات والحلوى فيسأله على)

على : عندك كازوزة فى صفايح ؟ !

البائع : عندى فى أزابز ! لكن الصفايح ليها تمن تانى عشان
حاجبيها لك مخصوص ؟ !

على : ولا يهمك ٠٠ هات اتنين ٠٠ وماتنساش تجيب
العرق اللى بنسحب منه الميه !

البائع : عرق ايه يا سيد ؟ !

شويكار : (للبائع) قصده تجيب الشاليمان ! الشفاطة
يعنى ؟ !

البائع : آه فهمت ٠٠ (يسير مناديا على بضاعته ثم يقف
أمام بنوار نجم بك الذى يطل عليه ويسأله)

نجم : عندك شيكولاته سويسرى ؟ !

البائع : كله مستورد يا سعادة البيه .

نجم : هات أكبر اتنين باكو عندك ؟

(يخرج بائع الكازوزة باكوين كبيرين . فيمد نجم
يده بورقة كبيرة يأخذها البائع الذى يبحث فى جيبه
عن الباقي لكن نجما يقول) :

نجم : خللى الباقي علشانك •

البائع : شكرا يا بيه • (يتحرك الى البناور الثاني ليوقف امامه لكن نهلة وناجى ورشيد يتجاهلونه تماما فيمضى حتى يختفى)

(فرقة الجاز تتوقف عن العزف عندما يسمع الجمهور الذى ملأ المسرح صوتا مهيبا جهوريا يدوى فى كل أرجاء المسرح دون معرفة مصدر معين له)

الصوت : سيداتى •• سادتى •• انظروا امامكم الى الستار الفاخر الذى سيفتح بعد لحظات لتروا العجب العجيب •• ولتسمعوا ما سيقوله على بابا •• انه صندوق الدنيا الجديدة الذى سيقدم لكم السحر على جناحين يطيران بكم الى مغارة الأحلام حيث الجواهر والعطور المستوردة من عاصمة الأناقة باريس •• انه بساط الريح الذى سيحملكم فوق عواصم العالم المتحضر لتروا كيف استطعنا ان نقلد هذه العواصم ونعيش على مستواها (الجمهور ينظر فى أرجاء المسرح بحثا عن مصدر الصوت لكن بلا جدوى) لا تحاولوا ان تعرفوا مصدر الصوت •• يكفى الامتلاء به واستيعابه •• رأيتم كيف أشعر بكل سكناتكم وحركاتكم ؟ ! سمعت مثلا منذ لحظات أحذكم يقول ان مسرحية الليلة مسرحية هائفة •• وان مسرحنا أحال المسرح الى مجرد تجارة رخيصة (ناجى يتجول بنظره ورقبته فى أرجاء المسرح لكنه لا يكتشف مصدر الصوت) لن أذكر اسمه حتى

لا اخرج ٠٠ فانا مؤمن تماما بالحريات الشخصية
وحقوق الانسان ٠٠ خاصة حق كل انسان في
ابداء رايه ٠٠ لكن ردنا سيكون عمليا عليه ٠٠
انه مسرحية الليلة ٠٠ « هكذا تكلم على
بابا » التي ستثبت للجميع ان مسرحنا مسرح جاد
وطليعي بمعنى الكلمة ٠٠ بل وأكثر جدية وطلاعية
من المسارح التي تدعى ذلك ٠٠ لقد استوحى
المؤلف العنوان من كتاب الفيلسوف الألماني
نيتشه « هكذا تكلم زرادشت » وهو نفس العنوان
الذي استوحاه الموسيقار النمساوي ريتشارد
شتراوس في قصيده السيمفوني الشهير ٠٠ ولكن
مع اسقاطات من تراثنا الشرقي الصميم ممثلة في
شخصية على بابا القريبة الى قلوبنا جميعا ٠٠
انها مسرحية لم ولن ترى عين مثلها من قبل ٠٠ كل
شيء فيها جديد أو مستورد ٠٠ حتى المؤلف والمخرج
الذين رفضا ذكر اسميهما وجنسيتهما حتى
لا ينصرف اهتمام الجمهور اليهما بدلا من تركيزه
على المسرحية ٠٠ وهذا منتهى الموضوعية ٠٠
وبمجرد فتح الستار في هذه الليلة العجيبة سنرى
أروع مما رآه على بابا عندما انفتح له باب المغارة
ووجد الذهب والفضة والزمرد والماس والياقوت
والمرجان (**الصدى يردد صوته عندما يذكر
المجوهرات والمعادن الثمينة**) ددد دهب ٠٠ ف ف ف
فضة ٠٠ ز ز ز زمرد ٠٠ ما ما ماس ٠٠ يا يا يا
ياقوت ٠٠ مر مر مرجان ٠٠ لكن الستار لن يفتح

هذه المرة بتعويدة سحرية .. بل سيفتح بمعجزة
الالكترونية .. فنحن في قمة عصر التكنولوجيا ..
فقد استوردنا كومبيوتر .. اى عقلا او حاسبا
الالكترونى لبرمجة فتح الستار وغلقه الكترونيا ..
وقد ارسلنا الأستاذ رعد فى بعثة على نفقتنا الخاصة
للتدريب على هذا الكومبيوتر ونقل التكنولوجيا
الجديدة الى المسرح المصرى .. ولتربية جيل جديد
على رفع الستار واسداله الكترونيا .. ومن
المعروف ان الأستاذ رعد امضى عمره فى عدة مسارح
اخرى يفتح الستار ويفلقه بجبال أصابته بكالو فى
أصابعه عالجناء منه بصعوبة .. وكان يحصل على
مرتب يقل عن خمس ما يتلقاه الآن فى مسرحنا
الالكترونى برغم أنه أقدم وأبرع من فتح الستار
وأغلقه ! لقد اكتشفناه كما اكتشفنا كل النجوم
والوجوه الجديدة التى ستستمتعون برؤيتها الليلة
لأول مرة فى هذه المسرحية الجريئة التى ستعزى
كل شيء .. كل شيء بدون استثناء .. فمسرحنا
هو مسرح الاكتشاف والتعزية .. هو قاعدة اطلاق
الطاقات الفردية .. ومن يرى الأستاذ رعد الآن
يرى فيه انسانا جديدا يعيش على مستوى العصر
وان كان لم يتخلص من بعض رواسبه البيروقراطية
مثل اصراره على توصيف وظيفته باسم : مدير
عموم ادارة رفع الستار واسداله .. وان كان
المستشار القانونى للمسرح أفتى بأن الوظيفة هى
مدير عام ادارة فتح الستار وغلقه .. ولا وقت لدينا

الآن في تقديم تفسيره للفرق الجوهرى بين عموم
وعام ٠٠ وبين الاسدال والغلق ٠٠ فهي قضية ادارية
وقانونية يطول شرحها ٠٠ لن اطيل عليكم اكثر
من هذا ٠٠ فانا اعرف مدى شوقكم لمشاهدة
المسرحية ٠٠ لكننى فى اللحظات الأخيرة قبل رفع
الستار أحب أن أنوه بالدور الرائع الذى لعبته
الرقابة فى اخراج هذا العرض الى حيز الوجود ٠٠
كان صدرها رجبا للغاية ٠٠ لم تحذف كلمة
واحدة أو حركة واحدة برغم الكلمات الجريئة
والحركات العارية التى يحتوى عليها العرض ٠٠
كانت الرقابة قمة فى الوعي عندما كتبت فى تقريرها
أنها كلمات وحركات لها وظيفة درامية فى النص
وليس مدموسة لمجرد الاثارة ٠٠ برغم أن الاثارة
الدرامية على أشدها من أول لحظة لآخر لحظة ٠٠
ولذلك أنصح ضعاف القلوب والأعصاب بالتماسك
خوفا على حياتهم من الانبهار الشديد الذى يمكن
أن يصل الى درجة لحس العقول !! ستنسبون
أنفسكم تماما مع الأحداث اللاهشة والفاتنات
الساحرات ٠٠ ستجدون المشاعر تندفق داخلكم
كنافورة ساخنة فوارة ٠٠ مشاعر لم تحسوها من
قبل ولن تحسوها من بعد ٠٠ لكن أرجوكم لا تنسوا
أنفسكم بهذه البساطة ٠٠ فنحن نحتاج الى وعيكم
ويقظتكم لأنكم جزء من العرض دون أن تدروا ٠٠
وبدونكم لن تقوم له قائمة ٠٠ لقد نجحنا أخيرا
فى تحقيق ما عجزت عنه كل مسارح العالم ابتداء

من عصر أرسطو الى عصر عادل امام .. فأنتم لستم
ضيوفاً بل أصحاب بيت .. وأنا متأكد من عودتكم
لمشاهدة المسرحية أكثر من عشر مرات على الأقل ..
فنحن خبراء التوابل المثيرة التي تحيل الليل الى
نهار والنهار الى ليل بحيث لا تعرفون رؤوسكم
من أرجلكم .. والألف من كوز الدرة .. والآن
اترككم لعالم السحر والجمال والأنوثة والاثارة ..

(تعود فرقة الجاز الى عزف افتتاحية
شبيهة بتلك التي كانت تعزفها من قبل على فترات
متقطعة وان كانت بايقاع أسرع مع الاضواء التي
تسطع وتختفى بكل الألوان الممكنة .. ثم يسود
الظلام تماما ومعه الصمت المطبق ثم تسلط الاضواء
على الستار الأحمر وتسمع الدقات التقليدية بطريقة
تصم الأذن ، ثم تعود الفرقة الموسيقية الى العزف
وتحدث اهتزازات شديدة للستار لكنه لا يفتح ..
وتستمر الموسيقى مع الاهتزازات التي تتزايد وعندما
تتوقف تصمت الموسيقى)

علي : (بصوت عال) ايه ؟ ! مش عارفين يفتحوا حنة
ستارة ؟ !

الجمهور : (كان على رأسه الطير) ش .. ش .. ش .. س ..
ش .. بلاش كلام !!

علي : (بسام ودهشة) خلاص .. دهدي .. أدى احنا
اتكنمنا !

(تطفأ الأنوار كلها ثم تضاء مسلطة مرة أخرى على
الستار .. وتعود الموسيقى بايقاع أسرع لكن الستار

يصاب بنفس الاهتزازات التي تتحول الى تشنجات
راقصة على ايقاعات الموسيقى لكنه لا يفتح .
تصمت الموسيقى وتضاء الأنوار كلها مرة أخرى)

علي : بطولك يا كل روح !! حنة قماشة مش عارفين
يفتحوها !

رشيد : (بصوت عال موجه لبنوار على المواجه) بلاش
تعليقات يا سيد .. دي حاجات طليعية مش سهل
انك تفهمها !

علي : اذا كنت انت فاهم .. نورنا يا بيه ؟ ! منك
نستفيد !!

شويكار : وانت قلقان ليه يا علوة ؟ ! ما احنا قاعدين
مستريحين !!

علي : خلاص نطلب حاجة نشربها ولا ناكلها .. بدل
ما احنا قاعدين زى قرد قطع !

شويكار : اللي تشوفه يا علوة .

علي : ايه حكاية علوة دي ؟ ! انا اسمي يا علي يا عليوة !!
لكن علوة دي ما بيقلاهش غير الحريمات .. ومش في
كل وقت عدم المؤاخنة !!

شويكار : خلاص .. آسفة يا علي بك !

علي : حلوة علي بك دي .. طالعة من بقك زى السكر
(يطل من البنوار يمنة ويسرة) فين الجدع بتاع
الكازوزة والشيكولاته والذي منه .

شويكار : انت مستعجل على ايه ؟ على مهلك .. الليل طويل .. ماورانش حاجة .

(في البنوار الثاني على اليمين يقول رشيد لكل من ناجي ونهلة)

رشيد : حكاية الستارة دي اوحث لى بعنوان يجنن للمقالة اللي حا اكتبها بكره عن المسرحية !

نهلة : (بشوق) اقدر اعرف العنوان يا استاذ رشيد !

رشيد : (متغزلا فيها) تعرفي يا آنسة نهلة ان اُعتيكي بتفكرني ببنت جريكية عرفتھا أيام الشقاوة والصرمة ؟ !

ناجي : (متدخلًا في حسم) ايه عنوان مقالتك اللي يجنن يا استاذ رشيد ؟ !

رشيد : الستار الحديدي !!

ناجي : بس الستار الحديدي ده معنى سياسى ومالوش اى علاقة بالمسرحية اللي حضرتك لسه ماشفتهاش وماتعرفش اى حاجة عن مضمونها !!

رشيد : (بعصبية وسخرية) يا بنى اذا كنت حاتبدأ حياتك بالشكل ده يبقى توقع الفشل الذريع .. حكم جيلكم مايعرفش غير الفتاوى والمقاوحة وبس .. لكن يعمل حاجة مفيدة .. لا .. كفا الله الشر .. انا مثلاً بدأت حياتي بكل تواضع .. كنت با المِيع مكتب سكرتير التحرير يوميا .. وبعدين اترقيت فبقيت المِيع مكتب مدير التحرير .. وبعدها

مكتب رئيس التحرير .. لحد ما بقيت رشيد
الساكت اللي اسمه على كل لسان .

نسايجي : أنا ماليش دعوة بتاريخ حياة سيادتك .. أنا كنت
بناقشك في معنى الستار الحديدي !!

نهيلة : (متدخللة لتغيير دفة الحوار) واشمعني بالذات
اخترت عنوان « الستار الحديدي » ؟! عشان
مش عاوز يتفتح ؟ !

رشيد : (في سعادة غامرة) الله ينور عليكى .. اتنبالك
بمستقبل عريض في عالم الصحافة الفنية .. كفاية
عنيكى العسلى اللي تجنن دى !

نسايجي : يا أستاذ رشيد .. سيبك من عينيها العسلى ..
وقوللى يعنى ايه « الستار الحديدي » .. خصوصا
انه كان على أيامك انت ؟ !

رشيد : أوعى تفكر انى عجوز عشان باقولك يابنى .. أنا
باقولك « يابنى » بس عشان أكيد الفرق في الخبرة
الصحفية بينى وبينك .. لكن ما يصحش تقوللى
أنا كنت على أيام الستار الحديدي !

نسايجي : ليه حضرتك ماكنتش لسه اتولدت سنة ١٩٤٦ ؟ !

رشيد : (يهجم مخرجاً في تساؤل) آه .. انت قصدك
المعنى السياسى للستار الحديدي ؟ !

نسايجي : هو مالوش غير معنى سياسى واحد !

رشيد : لما تنوغل في النقد الصحفى .. حاتعرف انه في
امكانك تحويل أى معنى لصالحك !

ناجى : لكن ايه معنى الستار الحديدى ؟ !

رشيد : (بسخرية) منك نستفيد يا عبقرى !!

ناجى : الستار الحديدى ده تعبير استخدمه رجال السياسة واجهزة الدعاية فى الغرب للدلالة على الحد اللي بي فصل الدول الشيوعية عن دول اوروبا الغربية .. وشاع استعماله بمعنى الحاجز الأيديولوجى الفاصل بين الدول الشيوعية وغرب الشيوعية .. وخصوصا خلال فترة الحرب الباردة .. واستخدمه ونستون تشرشل للمرة الأولى فى مارس ١٩٤٦ لما كان بيتكلم عن الحاجز أو الفاصل ده .

رشيد : (يصمت للحظات ونهلة تتأمله) آه .. فهمت ..

ناجى : الحمد لله .

رشيد : (بسخرية) لا .. مش ده قصدى يا استاذ ناجى !

ناجى : آمال فهمت ايه سيادتك ؟

رشيد : فهمت انت ليه عمال تلف وتدور م الصبح حوالين الستار الحديدى .. أنا فى الأول شكيت فى اتجاهاتك وميولك السياسية .. لكن كلامك المفضوح ده عن الستار الحديدى كشف نواياك الحقيقية !!

ناجى : نوايا ايه وبلح ايه يا استاذ !! ده الكلام اللي أنا قلته كله احداث وحقائق تاريخية .. ومالوش دعوة بالنوايا أو الآراء !

رشيد : (مقاطعا) أرجوك يا بنى .. سيبنى أكمل كلامى

عشان مصلحتك .. اوعى تصدق كلام المثقفين ..
دول ناس مايجيش من وراهم غير وجع الدماغ ..
دول يودوك فى داهية وهم قاعدين يتفرجوا
عليك !!

ناجى : يا استاذ رشيد .. المثقفين دول هم الخميرة الصالحة
للافتتاح ونمو أى مجتمع !

رشيد : انت اكيد واحد منهم !

ناجى : وانا يشرفنى انى اكون واحد منهم !

رشيد : ذنبك على جنبك .. انت اللى حاتتعب .

نهلة : ناجى مايصدقش يا استاذ رشيد .. هى دى طريقته
فى المناقشة .. لكن قلبه ابيض !

رشيد : (مغازلا) ده انتى اللى قلبك ابيض .. وعنيكى
عسلى .. ومستقبلك باهر ان شاء الله .

(ينهض الشاب الفاضل القلق العصبي ذهابا وإيابا
فى المكان الواسع بين المنصة والصف الاول فى حين
لا يزال المعجوز يقط فى نومه وشغيره . ثريا
سكوتيرة نجم بك تشير الى الشاب وتقول لنجم)

ثرىا : الشاب ده ماهمدش من ساعة ماجه .. ولافتح بقة
بكلمة يمين ولا شمال !! ولا حتى بص لحد !

نجم : خلىنا فى حالنا يا ثريا .. الدنيا علمتنى ان الواحد
ياخد باله من نفسه وبس .. لأنه لو خد باله من
أى حد تانى حايضيع تفكيره ووقته وجهده فى غير
المفيد !

ثريا : ده أنا بس بتسلى ٠٠ عبال ما يصلحوا الستارة
اللى محتاسين فيها دى !

نجم : وافرضى ما اتفتحش ٠٠ برضه مش مهم ٠٠ انتى
فاكرة أنا باكل م الكلام اللى قاله الجدع ده فى
الميكروفون ٠٠ ده جاى يبيع الميه فى حارة السقاين ٠٠
وعند مين ؟ ! عند جدع سقا فى الحارة كلها !!

ثريا : بس ٠٠ احسن ده بيسمع دبة النملة فى المسرح !

نجم : انتى بتاكل م الكلام ده (ينظر الى ساعته ثم يقدم
مفاتيح سياوته لثريا) وحياتك يا ثريا ٠٠ روحى
اضربى تليفون م العربية عشان نطمن على اخبار
العملية ٠٠ عشان انا عاوز نهد الفيلا بكرة ٠٠ وفى
اسبوع واحد بس نكون رمينا أساسات البرج ٠٠
وماتخليش درش يدق قوى فى الفلوس ٠٠ مليون
ناقص ٠٠ مليون زيادة ماتفرقش .

ثريا : حيلك ٠٠ حيلك يا باشا ٠٠ ده عشان السكان
يسمبوا الفيلا ٠٠ دى عاوزة اسبوع لوحده .

نجم : آمال احنا فين ؟ ! عربياتى وترلاتى كلها جاهزة ٠٠
حا انقلهم كلهم فى شقق آخر برج بنيناه ٠٠
حايصوا ع النيل ٠٠ وفى جيبهم خلو الرجل اللى
يعيشهم ملوك طول عمرهم ٠٠ فيه الذ وامتع من
كده ؟ ! ده ولا فى الأحلام !

ثريا : ربنا يخليك لكل أولاد الحلال الطيبين !! (تنهض)
عن اذنك أروح أضرب تليفون م الشبح !!

نجم : بلاش حكاية الشيخ دى ! مش عاوزين العينين تفتتح
علينا .. كفايانا قر !!

ثريا : الحسد بره وبعيد !! عن اذنك (تخرج من باب
البنوار)

**(فى البنوار الأول على اليسار ينهض على ويطل على
الصالة أمامه)**

على : ايه حكاية الستارة بالظبط ؟ ! احنا بقى مش دافين
عصافير !! ولا دافعين ميت أهيف فى الكسكرة
عشان نقعد ونحط ايدنا على خدنا .. ده
ولا معزى .. اللى يسمع كلام الراجل الأليط فى
الميكروفون يقول ده احنا حانشوف العجب ..
وبعدين حنة ستارة مش عارفين يفتحوها .. والنبي
اقوم امزعا ضبة ومفتاح !!

شويكار : انت زهقت من قعدتى يا على بك ؟ !

على : بصراحة بقى أنا جاى اتفرج ع الرقص واسمع
المغنى .. مش عدم المواخذه أقعد مع حضرتك ..
أنا جاى عشان آخذ بحقى حلف (بصوت اعلى)
مش كده وللا ايه ؟ !

**(أصوات همهمة تملأ رويدا من الصالة تحمل
أصواتا متداخلة)**

أصوات : بقالنا ساعة !! ايه الحكاية ؟ ! هو احنا جاين
نتفرج ع الستارة ولا ايه ؟ ! يا تفتحوا الستارة
يا ترجعونا فلوسنا !! باين عليها ليلة مش فايتة
... الخ .

(ينهض الشاب الغامض القلق وينظر لأول مرة الى
الجمهور في سعادة واضحة ثم يغاطبه)

الشاب : برافو .. على الأقل عشان يحسوا بوجودكم ..
حافظوا طيشة لحد امتي ؟ !

على : (بصوت عال) يمكن فاكرنا طراطر في مولد صاحبه
غايب ؟ ! ده احنا ولاد سوق ناكلها والعة !!

(تتصاعد همهمة الجمهور فتبدأ الفرقة الموسيقية
في عزف نفس المقطوعة في محاولة للتغطية على ضجيج
الجمهور لكن الفرقة تفشل في حين ينهض الشاب
الغامض مرة أخرى ويذهب الى المايسترو)

الشاب : الدوشة اللي عاملها الجمهور أحسن وأجمل
م الدوشة اللي انت عاملها .. على الأقل دوشة
الجمهور ليها معنى !!

(المايسترو لا يلتفت الى الشاب ، لكن الشاب
يمسك يده الحاملة للعصا فتصمت الموسيقى تماما)

الشاب : خد نفسك شوية لحد ما نشوف الليلة دي حاتنتهي
على ايه ؟ على الأقل تبطل عزف المقطوعة اللي انتم
مشن عارفين غيرها دي !! الناس طهقت !

المايسترو : أرجوك .. العقد بتاعى مع المسرح بينص على عزف
المقطوعة دي لحد نهاية العرض !

الشاب : دي شربة بقى ؟ !

المايسترو : الكلام ده مع المسؤولين عن المسرح .. أما أنا
فعبد المأثور !

(تتصاعد هممة الجمهور التي تتحول الى هتاف)

اصوات : مش عاوزين نسمع !! مش عاوزين نسمع !! مش عاوزين نسمع !!

(صوت خرخشة عالية في الميكروفون ثم نسمع الصوت مرة اخرى)

الصوت : هدد من فضلكم .. نأسف لهذا العطل الفني ونستأنف افتتاح الستار !

الشاب : (ناظرا في وقفته الى جدران المسرح وسقفه) اوعى تستخف بعقلنا .. لأن حسابك حايكون عسير معانا !

على : (من البثوار للشاب) ربح روحك يا أفندى .. انت بتكلم خيال !

الشاب : وبرضه بيخيل عليك الكلام ده يا معلم .. مصرى حا اعرف هو فين ؟ ! عشان اعرف له شغله !!

على : بس احنا جايين عشان نفرفش ونهيص .. ونتمتع مش عشان نتخانق ونعكر دمنا !!

الشاب : محدش قالك عكر دمك ! (يجلس الشاب متشجعا) (دقات المسرح التقليدية)

على : خلاص .. اهدى بقى يافندم .. آهى الستارة حاتنفتح خلاص !

(تطفأ الأنوار ما عدا تلك المسلطة على الستار وتعود الفرقة الموسيقية الى عزف نفس المقطوعة

ولكن بإيقاع سريع للغاية ، لكن الستار يصاب بنفس
التقلصات والهزات العصبية دون أن يفتح ! تضاء
الأنوار كلها مرة أخرى وتتوقف الموسيقى ، ثم تركز
الأنوار على مربع في أرضية المسرح أمام الستار
يصعد منه تدريجيا الأستاذ رعد مدير عموم ادارة
فتح الستار ثم يقف على حافة المنصة بجثته الضخمة
وبشرته البيضاء المشربة بالحمرة ، وحلته ذات
الطراز المملوكي الرصع صدرها بما يشبه الجواهر،
وطربوشه التركي الطويل وشاربه الذي يمكن أن
يحمل على طرفيه صقرين)

رعد : (بصوت غاية في التأثر) يشرفني أن أقدم نفسي
لسيادتكم .. فانا من الجنود المجهولين العاملين خلف
الستار وبين الكواليس .. وان كان الصوت العالي
قد تفضل وتكلم عن اسمي وتاريخ حياتي التي
امضيتها بين الجبال والستائر حتى أصبت بالكالو
الذي لم ينقذني منه سوى دخولنا في عصر
الالكترونات والتكنولوجيا .. (ينتقل الى اللهجة
العامية الهابطة التي تنم عن شخصيته الحقيقية)
محسوبيكم رعد .. مدير عموم ادارة رفع الستار ..
وانا في الحقيقة راجل صريح ومؤمن تماما بالانفتاح
نفس ايماني بالتكنولوجيا .. وعشان كده اللحظة
اللى بنمر بيها كلنا دلوقت في المسرح لحظة
صعبة وعصبية ونتمنى من الله ولا يكثر على الله انها
تمر على خير .. عشان دى أول مرة يتعطل فيها
الكومبيوتر اللى بيرفع الستارة .. مع اننا جربناه

من نهار ما ركبناه ييجي مليون مرة ٠٠ كنا ندوس
ع الزر ٠٠ ونسيب الكومبيوتر يفتح ويقفل الستارة
ليل نهار بطول يومين ثلاثة من غير ما يبطل ٠٠
يقوم ييجي انهارده ويعطل قدامكم عشان يسود
وشنا ٠٠ ده احنا استوردناه بمبالغ خرافية ٠٠
ده غير الكورس اللي انا سافرت له مخصوص
عشان أدرسه على ايدين الخبراء الأجانب في
بلادهم ٠٠ لكن ما تزعلوش ٠٠ حقكم على انا ٠٠
أمسحوها في ٠٠ حانبعث حالا لوكيل الشركة في
بيته عشان يجيب الخبراء بنفسه من بيوتهم

(ينظر الى ساعته) عشان التوكيل دلوقت قافل ٠٠
لكن حالا حايجوا ويشغلوا الكومبيوتر ٠٠ حكم ده
لعبتهم وماحدث بيهم فيه الا هم ٠٠ صحيح انا
اتدربت عليه ٠٠ لكن عشان أفتح الستارة
واقفلها بس ٠٠ لكن تصليحه لأ ٠٠ قعدنا نخط
فيه يمين وشمال ٠٠ مافيش فائدة ٠٠ رأسه والف
سيف انه ما يفتحش الستارة ٠٠ خفنا نبوطه ٠٠
قلنا ما بدماش ٠٠ ده بالطبط زي الباشا اللي
راكب الشبح ٠٠ يعرف يسوقها حلو قوي ٠٠ لكن
اذا اتعطلت يسيبها على طول للميكانيكي ٠٠

(يضحك بصوت عال لكنه يقطع ضحكته فجأة
عندما يكتشف أن أحدا لا يشاركه الضحك سوى
نجم بك الجالس وحده في البنوار) دلوقت الميكانيكية
الأجانب جايين وحانفتح الستارة وحاتبقى آخر
حلالة ٠

على : (يقاطعه مطلا من سور البنوار) أنا مش شايف أى مشكلة غير إنكم عاوزين تعملوا م الحبة قبة ٠٠ شد الستارة بإيدك وخلصنا ٠٠ هي كيميا !!

وعبد : (واضعا سبابته على فمه كما لو كان يأمره بالسكوت) بلاش تقول الكلام ده يا معلم ٠٠ أنا في عرضك ٠٠ انت عاوز ترجعنا لعصر الجبال والكالو ٠٠ يعنى كل الناس بتتقدم واحنا بتتاخر ٠٠ ثم ان الستارة دى مش ممكن تفتح الا الكترونى !!

على : (في تحد واضح) تحب انزل افتحالك بايد واحدة ؟ !

وعبد : اتفضل ٠٠ بس أنا مش مسئول عن اللي حايجراك .

على : (ببعض الخوف) حايجرالى ايه يعنى ؟ !

وعبد : والله ما اعرفش ٠٠ في الزمن التكنولوجى ده كل واحد مسئول عن تصرفاته !!

على : (جالسا) وعلى ايه ؟ !

الشباب : (ينهض واقفا في مواجهة عبد) انا عارف كويس ايه اللي حايجراله ؟ !

وعبد : (بمنتهى القلق والتوتر) ايه ؟ !

الشباب : ولا حاجة (يجلس صامتا) .

(يهبط عبد صامتا بنفس الطريقة التدريجية حتى يختفى تماما في الحفرة التي تفلق تماما وتستوى بأرضية المنصة)

نـاـجـى : (لثهله) انا مش فاهم حاجة خالص !

نهله : ولا أنا !!

وشيد : (لهما) اصبروا .. صحيح الجيل الجديد
ما عندوش صبر على حاجة أبدا !

**(تسلط الأضواء فجأة على بنوار نجم لحظة دخول
قربا من الباب وهي تطلق زغرودة في منتهى القوة)**

ثريا : الف مبروك يا نجم بك .. يا نجم النجوم .. الأرائب
الجديدة وصلت .. يتربوا في عزك ان شاء الله .

نجم : (ينتفض واقفا في نشوة) ياوش السعد .. ياوش
الهنا .. حانفتجها ان شاء الله مزرعة أرائب ..
(مستدركا) هيه ؟ ! قوليلي الأخبار بالتفصيل !!

ثريا : درش اشتري الفيلا بتلاتة مليون ونص .. وقاللي
دى الأرض لوحدها تسوى ستة مليون .. دى تأخذ
عمارة تلاتين دور .. كل دور خمس شقق ..
ده غير اللي يحب يأخذ فيلا على دورين .. يعنى
مكسبنا الصافي منها ما يقلش عن عشرين مليون
جنيه .

نجم : (ينظر بخوف الى الجمهور) وطى صوتك وقولى
ان شاء الله !

ثريا : طبعا (بصوت منخفض) ان شاء الله (ثم بصوت
عال) عقبال الجباب (ثم للفرقة الموسيقية)
سلام يا جدع !

(الفرقة تعزف سلام مربع للجدعان في حين ينظر

ناجى ونهلة ورشيد وعلى وشويكار من البنواير
مذهولين ، ويتنفض الثياب واقفا في دھول ،
أما المعجوز النائم فيتمطى في مقعده ثم يتشاءب بصوت
عال وينظر الى من حوله ثم يقف ويتحرك كمن يسير
في نومه ثم يعود الى مقعده للنوم مرة أخرى)

نجم : (بصوت عال) كل المسرح يهيص على حسابي الليلة
دى ٠٠ مشاريب ٠٠ مأكولات ٠٠ مكيفات ٠٠ حتى
الممثلين اللي احنا لسه ماشغناهمش ٠٠ كل واحد
حسب مزاجه !!

على : (يطل من سور البنوار بصوت عال) آدى الجدعنة
ولا بلاش !

ثريا : (بصوت أعلى من البنوار بنفس طريقة ربات البيوت
في الندادة على البائعين) يابتاع المشاريب ٠٠
يابتاع المأكولات ٠٠ يابتاع المكيفات ٠٠ انت فين
يا جدع انت ؟ جالك الفرج وانت ولا هنا !!

البائع : (يدخل من الكواليس اليمين ويقول بطريقة الباعة)
أيوه ٠٠ أنا جاى !! (يقف أمام البنوار)

ثريا : شوف طلبات البشوات والبهوات واللفندية اللي في
المسرح ٠٠ ادى كل واحد اللي نفسه فيه على
حساب نجم بك !

البائع : واحنا خدامين نجم بك !

نجم : (يمد يده بأوراق مالية كثيرة من البنوار للبائع)
هيص البشوات والبهوات ٠٠ كله مستورد ٠٠
فاهم ؟ والباقي دلج بيه روحك !

البائع : (ينظر فرحا الى النقود) يدوم عزك يا باشا ..
حاجيب المطلوب حالا .. وبعدين أبقي أدلع روعي !
(يختفي في الكواليس اليمين في حين يمد نجم يده
بمبلغ آخر للمايسترو)

نجم : ودم لزوم السلام المربع اللي ضربته للجدةان !
(المايسترو يأخذ المبلغ ويقود الفرقة مرة أخرى في
سلام مربع للجدةان)

الشباب : (ينهض متوترا ويذهب الى المايسترو) والسلام
المربع ده برضه من ضمن عقدك مع المسرح ؟ !

المايسترو : (بضيق) خف يا سيد تعوم .. تتقل تفرق
فطيس !!

الشباب : دى الفاظ يقولها مايسترو فنان ؟ !
(المايسترو لا يرد عليه ويقود الفرقة في سلام
مربع جديد)

(الشاب يذهب ليجلس في مكانه يائسا حائقا)
(الأضواء تسلط على بنوار نجم بك)

نجم : (ينظر الى ساعته قلقا) ياللا بينا يا ثريا .. مش
حايهدالى بال الا لما أقضى السهرة مع درش ..
عاوزه يحكيلى الحكاية كلها من طقطق لسلامه
عليكم بالتفصيل المل !

ثريا : ومش حانشوف العرض ؟ !

نجم : هو فيه عرض أجمل م اللي بنعمله بنفسنا !! ده احنا الأبطال والمتفرجين زى ما بيقول الجدع اياه فى الميكروفون . !!

ثرىا : قصدك الرجل الخفى (تضحك)

نجم : (ضاحكا) واللى مايتسماش . . (ينهض)
ياللا بينا . . (يخرج من البنوار وخلفه ثرىا)

(يدخل البائع من الكواليس اليسار حاهلا صندوق
المربطات والمأكولات ويبدأ فى فتح الزجاجات
وتقديمها أولا لعللى وشويكار)

عللى : البيه قالك مات مستورد !

(البائع يستدير ناظرا الى بنوار نجم وثرىا
فلا يجدهما فيسال المايسترو بصوت عال)

البائع : آمال فىن البيه الكبرا ؟ !

المايسترو : مشى هو وسكرتيرته .

البائع : وراجعين تانى ؟ !

المايسترو : ما طش !!

البائع : (ناظرا الى الجمهور وبصوت عال جدا) على فكرة
البيه ادانى حق الميه بس . . وعشان كده كل واحد
له قرازة واحدة بس !!

عللى : (بصوت عال) لكن البيه قالك مستورد ؟ !

البائع : من عيني دى وعيني دى . . لكن اللي عاوز مستورد
يستنى . . عشان المستورد حايأخر شوية !!

قولتوا ايه ؟ ! عاوزين مستورد ولا صنع في مصر ؟!

الجمهور : (هدير كالهتاف من جمهور الصالة) طبعاً .. عاوزين صنع في مصر ..

البائع : أهو كده المفهومية ولا بلاش !

(على يشرب ومعه شويكار صاغرين .. ثم ينتقل البائع حيث يجلس الشاب ليفتح له زجاجة)

الشاب : (يرفضها دافعا اياه بيده) مش عاوز !!

البائع : براحتك يا بيه .. كل واحد هنا براحته .. آمال ديمقراطية ازاي ؟ ! (ينظر الى الشيخ النائم) وطبعاً جدو نايم ومش حاشرب ؟

العجوز : (ينهض مستيقظا في حيوية لكنه يقول بصوت مرتعش) ومين قالك أنا مش عاوز أشرب .. هات (يأخذ الزجاجة ليشربها مستمتعا)

البائع : (جانبا) صحيح الدنيا حلوة وتستاهل الكلبشة فيها .. (يمشی بجهولته الى بنوار رشيد وناجى ونهالة) ..

(خرخشة في الميكروفون ثم يعود الصوت مرة أخرى)

الصوت : (بطريقة الكهربائية في الحفلات والأفراح والمآتم)
الو .. الو .. الو .. الو .. الو .. واحد .. اثنين ..
تلاتة .. مسرح الفرشة والمهيسة يرحب بكم وعلى

استعداد لتوصيل الطلبات الى المنازل .. كل
مسيراتنا مسجلة بالفيديو .. اى شريط تطلبه
تلاقيه عندك بعد نص ساعة على أكثر تقدير ..

(خرخشة واصوات متداخلة كنوع من الشجسار
الكلامى) بلاش فضايح .. احنا ناقصين .. ليلة
مش فايتهم ... الخ (يعود الصوت المحترم الوقور
مرة أخرى)

بشرى أيها السادة .. لقد تم الاتصال بوكيل شركة
كومبيوتر الستارة العالمية .. وطلب منا تكفى
ع الخبر ماجور .. عشان سمعة الشركة الدولية
وفروعها فى كل أنحاء العالم المتقدم والمتأخر .. قال
انه جاى حالا ومعاه الخبراء الأجانب وحاصلهم
فى ثوانى .. وقد انتقل الأستاذ رعد شخصيا الى
بيت وكيل الشركة عشان تكون رجله على رجله ..
لحد ما يجيب الخبراء .. كل واحد من بيته ..
وسنوافيكم بالإنباء تباعا .. ولحين صدور اشعار
آخر أحضرنا لكم البروفيسر حسونة المهلب الساحر
العالمى الذى قدم عروضه من قبل فى مونت كارلو شو
وتحدى ديفيد كوبرفيلد الذى كان على وشك
الانتحار بسببه .. رجب بالمجئ خصيصا ليقدم
العابه التى اذهلت العالم النامى وصحته من نومه ..

الشباب : (يقف ملوحا بقيضته فى الهواء) احنا عاوزين نعرف
حكاية الستارة بالظبط !! الكلام ده ما يخشش دماغ
عيل عندد خمس سنين ..

الصوت : يعنى انت الوحيد اللى عندك مخ وبتفكر .. وكل
اللى قاعدين دول على باب الله .. لا مخ
ولا يحزنون !!

الشباب : مالكنش دعوة باللى قاعدين .. وخلينا فى حكاية
الستارة !!

الصوت : اللى قاعدين دول ضيوفنا .. واحنا مانسمحش
لجنس مخلوق انه يمس ضيوفنا ولو بكلمة هايقة .
(همهمة وأصوات الجمهور)

الجمهور : ماتقعد يا أستاذ !! مالك مش قاعد على بعضك
ليه ؟ ! عمال تفرك وتحرك ليه ؟ ! جيتلنا الكلام
لحد عندنا ؟ ! يكونش على راسك ريشة !!

الشباب : (مذهولا) آسف .. آسف .. فعلا أنا غلطان ..
حقكم على .. خليكوا قاعدين لحد الفجر لحد
ما تتفتح الستارة المعجزة .. (يجلس يائسا
حائقا)

(الفرقة الموسيقية تعزف نفس القطعة المتكررة)

(الأضواء تتلاعب بكل الألوان على حسونة الذى
يدخل من المنصة أمام الستار وقد ارتدى البذلة
الاسموكنج والتوب هات ، وخلفه فتاة آية فى الجمال
ترتدى ملابس آية فى الاثارة ، وتدفع أمامها عربية
فوقها صندوق أسود لامع وبعض الكؤوس الفضية
التي تعكس بريق الأضواء . يصل الموكب ليستقر
فى منتصف المنصة أمام الستار . ينحنى الساحر
فى رقة الجنتلمان ردا على تصفيق الجمهور)

الساحر : (بصوت رقيق ناعم) في الحقيقة أنا مش عارف
أعبر عن سعادتي لوجودي بينكم الليلة .. لكن
السعادة الفامرة دى ما بتمنعش حاجة بتعكرها ولازم
أحكي لكم عليها !

على : (ينظر من بنوار نجم الذى تسلل اليه واحتله بعيدا
عن شويكار ويقول بصوت عال مناديا الساحر)
أحكي كل حاجة يا جدع !

(وهو ينظر في شراة الى مساعدة الساحر الجميلة)
على النعمة حاتحلو .. وحاتبقى آخر حلالة ..
وأجدع من فتح أى ستارة .. يعنى هى الستارة
وراهها ايه ؟ ! شوية لك وعجن ولت وكلام
فارغ !!

(الساحر ينحنى في رقة في اتجاه على مجييا اياه في
حين كانت شويكار تتابع حديث على في ذهول ثم
تتسلل مسرعة من بنوارها الى بنوار على وتدخل
عليه وهو لا يزال ينظر في شراة الى مساعدة
الساحر . يفاجأ على بشويكار واقفة الى جواره
فيجلس مستسلما وهو يحاول تجاهلها)

الساحر : الحاجة الى بتعكر سعادتي بيكم الليلة دى هى وفاة
المغفور لها الأميرة جريس كيلي (يخرج منديلا أبيض
من جيبه ويمسح في تكلف وتصنع ما يتصوره
دموعا) .. لما كنت في مونت كارلو شو كانت
المرحومة ماتحبش تنفرج الاعلى ألعاب حسونة
المهلب .. البروفيسير الساحر المهلب .. كانت

تطلبني مخصوص في قصرها عشان افرجها
ع السحر اللي عمرها ما شافته .. (بتأثر وفش
شديدين) الله يرحمها .. كانت تقوللى ان المصريين
من آلاف السنين هم ملوك السحر .. وحسونة
المهلب بيعيد امجادهم .. اصل انتو مش عارفين
ايه اللي حصل ؟ ! (بصوت منفعل متهدج) خليت
القصر بتاعها يطير .. كله كله .. ويعدى البحيرة
ويطلع فوق السحاب .. وهى يا عيني حاتجنن وتناق
على صدرها وتشيق (يدق على صدره ويشيق)
وتقول : يا نهار مش فايت ايه ده اللي بيحصل
يا اولاد ؟ ! مش ممكن ده اللي بيجرى ؟ ! مرة
ثانية خليت الميه في حنفيات القصر تتحول لكولونيا
وبرفام .. وهى يا عيني حاتجنن وتقول (الجهور
يشاركه الرد هذه المرة) ايه ده اللي بيحصل
يا اولاد ؟ ! مش ممكن ده اللي بيجرى ؟ !
ده احنا لو فضلنا ع الحال ده مش حانلاقى ميه
نشربها .. صعبت على والدمعة فرت من عيني ..
ورحت محول الكولونيا ميه مرة ثانية !! ومرة
تالته خليتها تطير بالعربية الرزرز بتاعتها وخافت
موت .. وهى يا عيني حاتجنن وتقول (الجهور
يشاركه بصوت أعلى) ايه ده اللي بيحصل
يا اولاد ؟ ! مش ممكن ده اللي بيجرى ؟ !

الشاب : (ينهض مواجهها الساحر) عاوزين نعرف بقى ..
الكلام ده بيتقال عشان نضحك ولا عشان نصدقه ؟
أبو لمعة زمان كان يقول كلام أناح من كده !!

الساحر : أصبر يا شباب .. هو انت لسه شفت حاجة ؟ !

(للجمهور) شباب اليومين دول ما يعرفوش حاجة
اسمها الصبر !

الشباب : (يجلس متاففا) يطولك يا كل روح !!

الساحر : (للجمهور مكهـمـلا حكاياته) وعشت أيام في موناكو
زى الحلم .. اى والله .. زى الحلم .. لحد ما جه
اليوم اللى ماتت فيه الأميرة جريس كيلي في حادثة
العربية المشؤومة .. واللى كانوا غيرانين منى في
البلاط .. والسحرة اللى قطعت رجلهم زى
ديفيد كوبرفيلد وبول دانيالز .. وشوا بى عند
الأمير وقالوا له ان سحرى هو اللى طار بالعربية
ووقعها من فوق الجبل .. لكن كل ده كذب والله
العظيم .. صحيح أنا ساحر عالمى خطير .. لكن
عمري ما استعملت سحرى في الشر .. بالعكس ..
ده أنا باعلم الناس بسحرى ازاي يكسبوا ويقنوا
ويبقوا أغنياء وأمرء من غير ما يتعبوا .. زى
ما حـا أعلمكم دلوقت .. بس .. هى دى الحكاية
اللى كانت ممكنناى .. واللى جيت بعدها على
ملاوشى من موناكو .. لكن لحسن حظى مرة
تانية .. جيت عشان أقابل الجباب كليم في
مصرحنا الليلة ده .. والآن الى عالم السحر
(يشير الى الفرقة الموسيقية لتعزف نفس المقطوعة)
يخرج من الصندوق الأسود عصا تتحول في يده

الى منديل ابيض فيصفق الجمهور • ثم ينفذ
المنديل عن حمامتين بيضاوين • ثم يخرج من كفه
بيضة تتحول في يده الى عدة اعلام او مناديل مختلفة
الالوان • ثم يقوم بتنويم مساعدته تنويما مغناطيسيا
فوق المائدة ويرفعها دون أن يمسها ، ثم يقوم
بادخال الصندوق الاسود الالامع الذى ينشره
بمنشار لامع الى قطعتين وأية ألعاب سحرية أخرى
لكنها كلها تقليدية ولا تمت بصلة الى الأساطير
الخارقة التى رسمها حول نفسه)

الشباب : (ينهض حائقا بمجرد انتهاء تصفيق الجمهور
للساحر) الألعاب دى بيقوم بيها اى حاوى فى
مصر •• يقف فى أى حارة ولا على أية ناصية ويلم
حواليه العيال •• من غير الراجل ما يقول مونت
كارلو شو ولا موناكو ولا جريس كيلي !!

الساحر : (فى تحد سافر لأول مرة) انت يا سيد جاى للفرشة
والنعنشة وللا للكننة وحرق الدم •• ماقيش داعى
تخش فى شمال •• عشان انت مش قدى !!

الشباب : حاتعمل ايه يعنى ؟ !

الساحر : يا جدع انت هتش قدى ؟ !

الشباب : اللى تقدر عليه اعمله !!

الساحر : يعنى تبقى مبسوط لو سخطتك قطرة ؟ !

الشباب : على الأقل حا أخربشك وأجرى من غير ما حد
يمسكنى !!

الساحر : يعنى معترف انى أقدر أسخطك قطعة ؟ !

الشباب : الميه تكذب الفطاس !

الساحر : (متجاملًا تحدبه ومغيرًا مجرى الحديث) انت يا بنى
فيه تار بينى وبينك ؟ ! حد مسلطك ؟ !

الشباب : أنا مافيش حاجة بينى وبينك .. لكن مابحش
الضحك ع الدقون !

الساحر : يعنى كل اللي قاعدين دول هيل .. مافيمش واحد
ناصح ومفتح ومدقق الا انت ؟ !

الشباب : اوعى كمان تفتكر انك حاتوقع بينى وبينهم ..
ده أنا واحد منهم .. والظاهر ان اللي بعثوك مش
عارفين الحكاية دى كويس !!

اصوات : (همهمة بين الجمهور ما بين معارض ومؤيد)
آه .. عنده حق !! .. وماله ما تسببه خلىنا
نتفرج .. احنا خسرايين حاجة !! ده فعلا ضحك
ع الدقون !! .. فبن المسرحية ؟ ! وتفرق ايه ما هو
ده أحسن من أيتها مسرحية ؟ ! .. الخ .

الشباب : (للجمهور كله) ما أهو اصل عشان مافيش برنامج
للعرض مطبوع ومتوزع علينا .. وعشان كده ممكن
نتوقع أى حاجة ؟ ! فبن برنامج العرض زى كل
المسارح اللي فى الدنيا ؟ !

اصوات : (همهمة بين الجمهور من خلال كلمات تتردد

متداخلة) أيوه ٠٠ فين البرنامج ؟ ! عاوزين
البرنامج ؟ ! عاوزين نعرف ايه اللي بيحصل ؟ !

الساحر : (جانيا لمساعدته) دى لينة مش فايتة !! ياللا بينا !!
(يللم حاجياته ويسرع بعزبته مع مساعدته ليختفيا
من يمين المسرح)

أصوات : (همهمة بين الجمهور في أثناء خروج الساحر)
ياللا يا بتاع جلا جلا !! فاكرينا داقين عصافير ؟؟
يا بتاع هوكس بوكس ٠٠٠ الخ (ثم يسود بعض
الصمت) .

ناجي : (ينهض من البنوار مخاطبا الشاب بحماس واعجاب)
عندك حق ٠٠ فين برنامج العرض المسرحي ؟ !
مش كده وبس ٠٠ دى تذكرة المسرح في حد ذاتها
هى عقد بين المتفرج والمسرح ٠٠ واى طرف يخل
بالعقد لازم يتعاقب ٠٠ الدنيا مش سايبة !!

الشباب : ده احنا مانعرفش من المسرحية غير اسمها « هكذا
تكلم على بابا » !!

ناجي : متنهياى الحاجة الوحيدة الصادقة في المسرح ده ٠٠
اسم المسرحية !!

الشباب : تفتكر على بابا قال ايه ؟ ! ولا حايقول ايه يعنى ؟ !

ناجي : كل اللي عارفينه ان على بابا قال : افتح ياسمسم !!
وبعدما بقى مليونير ٠٠ ولا ملياردير !

الشباب : أنا مش عارف ٠٠ احنا معجبين بعلى بابا ليه ؟ ! مع
انه الحرامي اللي سرق الحرامية !!

ناجى : الظاهر ان هى دى الشطارة !! الحرامى اللى يسرق
الراجل الشريف .. ده حرامى تقليدى خايب ..
وخصوصا ان الشريف غالبا بيبقى على باب الله ..
لكن الحرامى اللى يسرق الحرامية هو ده البطل
الحقيقى •

الشباب : اصله بيننقم للناس م الحرامية .. لكن لحسابه
الشخصى !!

ناجى : والظاهر احنا الليلة دى دخلنا مغارة على بابا ..
واحنا بقى وحظنا ؟ !

الشباب : بس احنا بقى مشى حرامية !!

ناجى : ما هى دى المأساة .. الظاهر احنا دخلنا عشان
تبقى ضحايا .. لازم ندفع ثمن تفغيلنا !

الشباب : ولازم نعرف ان القانون لا يحمى المغفلين !

رشيد : (يتابع الحوار بين الشباب وناجى فى قلق منذ بدايته
عندما يخرج من البتوار ليظهر بمفرده فى البتوار
الأول على اليسار - بتوار على وشويكار سابقا -
ويحاول أن يشير لتهلة كى تنضم اليه لكنها تنظر
الى ناجى ثم اليه فى حرج ولا تتحرك فيرتدى على
مقعده فى استسلام ويأس)

(خرخشة فى الميكروفون ثم يعود الصوت مرة
أخرى عاليا جدا)

الصوت : هكذا تثبت لكم اننا فى منتهى الديمقراطية بأسلوب
عملى .. سبناكم نازلين شتيمة فى المسرح بتاعنا ..

يقينا حرامية .. وقاعدين في مغارة على بابا ..
واحنا بقى وذن من طين وودن من عجين عشان
تاخذوا راحتكم .. لكن ما دام فتحتوا موضوع
عنوان المسرحية .. انا حا اقولكم قد ايه تعينا
وصرفنا دم قلينا لحد ما لقينا العنوان المحترم ده ..
اعلنا عن مناقصة اشتركت فيها كل مكاتب
وشركات المقاولات المسرحية .. وفتحنا المظاريف
ولقينا اسامى وعناوين تجيب المشنوق من على جبل
المشنقة عشان يتفرج على المسرحية .. عناوين
زى : دلعننى يا معيلص .. الواد ابو قصة
ماحصلتش .. رزق الهبل .. غطينى وصوتى ..
جاتها نيلة اللي عاوزه خلف .. شرابة خرج ..
وعناوين ثانية م اللي تكسر الدنيا .. لكن احنا
عشان مسرح محترم جاد .. رفضنا كل العناوين
الهابطة دى .. مش خوفا من النقد اللي ماحدش
بيقرأ لهم كلمة واحدة .. ولكن احترامنا لعقلية
المتفرج .. اخترنا « هكذا تكلم على بابا »
وحانسبيكم على نار .. مش حانقولكم قال ايه
والا حانحرق المسرحية .. ومش مهم تقولوا علينا
حرامية .. نصابين .. غشاشين .. عشان احنا
مؤمنين بالرأى الآخر .. مهما شط او تجاوز
حدوده .. هى بس مشكلة الستارة اللي فتحت
الموضوعات دى اللي مالهاش لازمة .. لكن بمجرد
أما تنفتح مش حاتعرفوا راسكم من رجلكم .

الشباب : (للصوت) اذا كنت صادق في كلامك .. بان كده

عشان نعرف نكلمك .. بدل ما انت عاملنا شبح ..
وماحدش عارف يمسكك من حتة !!

الصوت : (بمنتهى التواضع) أنا بصراحة بقى احب اكون
م الجنود المجبولين .. اصل أنا ما بحبش
الاستعراض زيك !

على : (ناظرا من البنوار وموجهها كلامه للشباب) أنا عاوز
أعرف يا سيدنا اللفندى انت تاعب روحك ليه ؟ !
احنا ما خسرناش حاجة .. آدى احنا شغنا الحاوى
وانبسطنا بالعباه ومنظر البنت القمرية اللى معاه
زى لهطة القشطة .. والراجل كان ناوى يستمر
لولا انك عكرت دمه وعكننت علينا .. م الصبح وانت
حاتموت على فتح الستارة .. يعنى احنا حانشوف
وراها الذم اللى شغناه قدامها ؟ !

ناجى : (ناظرا لعلى من البنوار) بس احنا يا سيد جاين
نتفرج على مسرحية جادة .. مش جاين نتفرج على
شغل حواة .. المفروض ان ده مسرح مش كاباريه !!

على : عدم المؤاخذه بقى فى الكلمة دى .. باين عليك
معقد !!

ناجى : (يبتسم للشباب) ومين بقى اللى عرفك الكلمة
دى بقى ؟ !

على : مراتى الجديدة متخرجة من قسم علم النفس ..
ودايمًا تهزر معايا وتقوللى يا معقد لما أحبكها !!

ناجى : اسمه علم النفس مش النفس يا معلم !

علي : مش بقولك معقد وبتدق ع الهيايفة ؟ ! بذايمك ايه
الفرق بين النفس والنفس ؟ ! هو لولا النفس كان
حاييقي فيه نفس ؟ !

شويكار : (صارخة من مقعدها) يا سلام عليك يا معلم ..
متعلم ومتنور ومتريش كمان !! وان شاء الله حاتبقى
أرستقراطي زبي بالطيط !! (تطلق زغرودة عالية)

الشباب : (كناجي) اقعد .. استريح !! انت حاتناقش مين؟!
مشكلتنا الأساسية مع الصوت !! لازم نعرف ايه
حكايته بالطيط وناوي على ايه معنا !!

الصوت : (بلهجة مسرحية عالية صاخبة) بشري سيداتي ..
لقد اتصل بنا وكيل شركة كومبيوتر الستارة الآن
من سيارته بالتليفون واخبرنا انه نجح في جمع
خيرين وجاري البحث عن الخيرين التانيين ..
وحاييقي على طول بمجرد انه يلاقهم !!

الشباب : ايه البشائر دي كلها ؟ ! ده ايه الهنا اللي احنا
فيه ؟ !

الصوت : ولسه ؟ ! انتو لسه شفتم حاجة ؟ ! أما البشري
التانية بقي .. فهي ان باليه على بابا والأربعين
حرامي اللي كان بيقدم عروضه في المولان روج في
باريس .. وصل اليوم بالطيارة .. ولما عرف
مشكلة الستارة ومسرحية « هكذا تكلم على بابا » ..
قرر انه يرفه عن جمهورنا الحبيب بتقديم باليه على
بابا .. وآهي كلها بركات على بابا .

علي : (منتشيا بصوت عال) يعني ايه باليه ؟ !

الصوت : يعنى رقص وفرشة ومهيسة !

على : (يقوم راقصا في البنوار مثل أولاد البلد في نشوة بالقة) يعنى حاشوف رقاصات .. كان قلبى حاسس م الأول حاشا اتفرج على رقص .. لا وايه ؟ ! رقص لى انا لوحدى !!

الصوت : (مداعبا اياه في مرح) ازاي ؟ ! ده الرقص ده لكل جمهورنا الحبيب ؟ !

على : مش قصدى .. أصل أنا عدم المؤاخذه .. اسمى على عليوة .. وزمابلى التجار مسميينى على بابا .. عشان باحط ايدى فى التراب أعمله ذهب .

الصوت : يعنى زى على بابا لما لقي المغارة .. وخد منها الذهب والفضة والمرجان والياقوت .. وقعد يصرخ ويقول : ذهب بابب .. فضة .. فضة .. ضة .. مرجان .. جان .. جان .. قوت .. قوت .. قوت .. قوت .. قوت (يتفجر ضاحكا) .

على : (صارخا في نشوة) على النعمة ليلتنا أنس !! لا يرقص فى البنوار فى حين تشمه شويكار كى تجلسه)

شويكار : مش كده يا معلم .. مش كده يا علوة .. الناس يتفرجوا علينا أهال !

على : (مستنكرا) جرى ايه يا مدام ؟ ! انتى حاتعلمينى أعمل ايه وما أعملش ايه ؟ !

شويكار : باردون .. مش قصدى .. بس أنا خايفة عليك
عشان بعزك !!

على : بيقولوا فى الأمثال ابعد حبة تزيد محبة !

الصوت : (بصوت جهورى صاحب) سيداتى .. ساداتى ..
لحظات ويهل عليكم فريق باليه على بابا والأربعين
حرامى .

(تبدأ الفرقة الموسيقية فى عزف اللحن الأساسى فى
أوبريت على بابا الإذاعى الشهير وتطفأ الأنوار
باستثناء تلك السلطة على الفرقة الموسيقية ..
وفجأة تتلاعب الأضواء من كل الألوان على راقصات
البالية القادرات فى رقص وشيق خلال الممر الذى يقع
بين مقاعد الصالة الى أن يصلن الى المنطقة الشاغرة
الفاصلة بين المنصة والصف الأول وقد حملت كل
واحدة منهن جرة أو قدرا بالوان فوسفورية مبهرة ..
يصعدن الى مقدمة المنصة أمام الستار ويضعن
جرارهن فى صف متناسق ، وكل واحدة ترقص وتدور
حول جرتها .. ثم يهبطن من على المنصة فى رقصات
رشيقة صوب الشباب الذى يتمايلن حوله فى مقعده
فى الصف الأول وهو يحاول أن يتفاداهن بقدر
الامكان ، لكنهن يوشكن أن يطبقن عليه من كل
ناحية)

على : (صاخا) يا بختك ياعم ؟ ! أهى جاتلك بيضة مقشرة
لحد عندك !! حاتقول إيه دلوقت ؟ !

(تضيق الراقصات الخناق على الشباب الذى يفر

منهن صاعدا فوق المنصة أمام الستار المغلق ، لكنهن
يواصلن مطاردته في اصرار شديد فوق المنصة
أيضا)

(يواصل على صراخه) انتم حاتغلبوا روحكم معاه
ليه ؟ ! ده بيرفس النعمة اللى جت لحد عنده ..
ورفس النعمة حرام ! تعالولى وأنا مش حا اجريك
ولا حا ادوخكم .. حاتلاقوني زى الخاتم فى ايديكم ..
من ايديكم دى لايديكم دى .

(الراقصات يواصلن مطاردة الشاب)

(يصرخ فيهن) سيبوه .. ده فقرى !! مالوش فى
الطيب نصيب !

(الراقصات يقبضن أخيرا على الشاب ويعدن به الى
مقعده وهو يقاومهن بلا جدوى ثم يدرن أمامه فيما
يشبه حلقة الزار صعودا على المنصة وهبوطا
منها)

(يقفز على من على سور البنوار الى الارض ويسرع
الى الراقصات ويشترك معهن فى حلقة الزار محاولا
لمس احدهن لكنه يفشل تماما فى حين تتابعه شويكار
من البنوار فى يأس واستسلام كاملين . والموسيقى
تعلو بدقات الزار الرئيسية الرهيبة والراقصات
منتشبات بالحركات وبينهن على)

على : (صارخا بأعلى صوت) فينك يا خالتي بمبة ..
يا أجدع كوديا فى الحنة !! تعالى شوفي الرقة
والجمال !! آه يانى !! آه يانى !! أنا فى حلم ولا علم

يا ناس !! وقال عاوزين يفتحوا الستارة !! خليها كده
على طول !

(تمسك الراقصات بالشباب في محاولة لاجباره
على دخول حلقة الزار لكنه يقاوم في استمالة مذهلة -
وعندما يجد أن التبار يكاد يعرقه يصرخ ويجرى
صاعدا فوق المنصة قائلا للجمهور بأعلى صوت)

الشباب : عاجبكم كده ؟ ! وقاعدين تتفرجوا ؟ !

(تمتد الراقصات عنه للحظة وتخفت الموسيقى
قليلا)

على : (صارخا فيهن) ياللا بينا .. سيبكم منه (ياتى
بحركات الزار لكنه يتوقف عندما يدرك أن أحدا
لا يشاركه الرقص)

الشباب : (صارخا) كفاية .. كفاية .. يابنات الشياطين ..
عاوزين منى ايه ؟ ! عاوزين منى ايه ؟ ! مهما عملتم
مش حاتقدروا !! وأنا وانتم والزمن طويل ! أنا
وانتم والزمن طويل !!

(تحمل كل راقصة الجرة التى أتت بها ثم يبدآن
في الهبوط من على المنصة والانسحاب تدريجيا
بظهورهن من اليمين في حين تضاء أنوار المسرح كلها
ويبهط الشباب مجهدا الى أن يرتدى على مقعده)

وشسيد : (يطل من البنوار مشيرا الى نهلة كي تنضم اليه
لكنها تهز سبابتها علامة الرفض في حين يلحظ ناجى
مناورته)

ناجى : (مطلا من سور البنوار كى يواجه رشيدا بقدر
الإمكان) يا اخى مش عاوزة تجيلك .. هو بالعافية !!

**(بتراجع رشيد الى الخلف ولا يرد محاولا تفادى
الموقف بالاختفاء داخل البنوار)**

اصوات : (همهمة بين الجمهور تصل الى حد الهتاف المتكرر)
سيما اونطة .. هاتوا فلوسنا .. سيما اونطة ..
هاتوا فلوسنا !!

الصوت : (يعلو فيما يشبه الصراخ) من فضلكم .. من
فضلكم .. ده مسرح .. مش سينما (يغث ضجيج
الجمهور تدريجيا) وكم ان احنا ما ضحكناش على
حد .. بالعكس انتم شفتم حاجات زيادة على ثمن
التذكرة .. شفتم ألعاب الساحر العالمى حسونة
المهلب وباليه على بابا والأربعين حرامى .. كل
ده ببلاش (يضحك) عاوزين تنهبوا بقى (ينفجر
ضاحكا لكنه سرعان ما يتوقف عن الضحك عندما
يدرك ان احدا لا يشاركه الضحك)

اصوات : (يعود هتاف الجمهور تدريجيا) سيما اونطة ..
.. هاتوا فلوسنا .. سيما اونطة .. هاتوا
فلوسنا !!

**(تطلقا أنوار المسرح تماما ليسود الظلام ويصمت
الجمهور للحظات)**

الصوت : لا تخافوا .. انه مجرد فيوز ضرب .. وسيأتى
الكهربائى حالا لاصلاحه .. والحمد لله .. فالصالة
هنا فقط هى المظلمة أما مدخل المسرح والكافتيريا

والكاتب كلها مضيئة .: يمكنكم الذهاب الى هناك
والتمتع بأطيب المشروبات والمأكولات التي تقدمها
لكم فتيات في منتهى الجمال والجاذبية .. وادبكم
شفتم العينة التي كانت مع حسونة المهلب وباليه
على بابا والأربعين حرامى .

أصوات : (همهمة عالية من الجمهور) ايه المسرح النكتة ده ؟ !
ده شغل نصب واحتيال !! اللي ما فيه حاجة شغالة
خالص !! الستارة وما عرفوش يفتحوها .. وكمكان
النور يتقطع !! أما نشوف ايه آخرتها ... الخ .
(الجمهور يخرج مستسلما في الضوء الصادر من
مدخل المسرح)

الفصل الثاني

(النور عاد الى الصالة لكن الستار لا يزال مغلقا .
الفرقة الموسيقية تعزف نفس المقطوعة المتكررة .
الجمهور يتوافد تباعا الى المقاعد . نسمع صوت
أقدام كثيرة متتابعة وهمهمة غير مفهومة وخافتة
(ويفضل أن تكون ضمن شريط الصوت) . يدخل
على البنوار الأول وفي أعقابه شويكار ، ثم نهلة
وناجي وخلفهما رشيد بحيث يجلس ثلاثتهم في البنوار
الثاني على اليمين ، كذلك يدخل العجوز مستندا
الى يد الشاب الذي يبدو سعيدا به) .

شويكار : (لعلنى) عندك حق .. التهوية حلوة برضه !!
أهو الواحد يمشى رجليه .. والايد البطالة
نجسة .

على : (بغيث ابن البلد) مش دايم !! (ثم ينفجر ضاحكا
لكن شويكار لا تفهم مقصده وتنظر اليه في
دهشة)

شويكار : اياك بقى الستارة ما تفتتحش ؟ !

على : الناس كانوا في منتهى الصراحة ؟ ! مش حا تفتتح
الا لما بييجى الخبرا الأجانب اللي بيقيموا فيها !!
أمال .. ادى العيش لخبازينه !! (الفرقة تتوقف
عن العزف)

(الضوء يتركز على البنوار الثانى)

نهيلة : (لناجى) دى ليلة ليها العجب يا ناجى .. حصلت
فيها حاجات ما خلتنيش أعرف راسى من رجلى !!

رشيد : (مقحما نفسه فى الحوار) سلامة راسك ورجليكى !!

ناجى : (متجاهلا رشيد) الظاهر انه هو ده قصدهم ..
يخلونا كده تايهين ولا يصين ؟ ! وكل أما نيحى نفوق
يطلعونا حاجة عشان نتلوى فيها .. يعنى عاوزينا
نبقى فى غيبوبة مستمرة عشان ما نطالبش بتمن
التذكرة !!

رشيد : (مصرا على اقحام نفسه فى الحوار) مش بالذمة
ليلة مثيرة !! احنا عاوزين م المسرح ايه أكثر من
كده ؟ ! مفاجآت وغموض واثارة عشان ننسى الهم
اللى احنا فيه .. ده انا جاتلى أفكار تكفى أربع
خمس مقالات .. هو القارىء عاوز منى ايه غير
الاثارة والتشويق والتسلية .

نـاجـي : (مقاطعا رشيد) والضحك ع الدقون !!

رشيد : (بعصبية واضحة) هو لازم يعنى عشان الواحد يبقى جاد .. ما يقدمش للناس الا الفلاسة وتقل الدم والكلام الدبش اللي ماحدش يفهمه ؟ !

نـاجـي : مافيش فائدة .. احنا مش ممكن حانتفق .. أنتوا خدنتوا الصحافة بدرى .. أيام ما كانت موضوعات انشاء وكلام لا يردى ولا يجيب .. ولسه مكلمشين فيها وقاعدين على نفسها .. وأى واحد م الجيل الجديد يحاول يمد رجله أو حتى ايده عشان يحط بصمة جديدة .. تقطعوها على طول .

وشـمـيد : عشان أوريك قد ايه انت حاقد .. أنا عندي اثنين ثلاثة خريجين من قسم النقد عندكو .. زى ابنائى تمام .. مش بس تلاميذى !!

نـاجـي : قصدك زى صبيانك تمام .. يستجى الصبي يعترض على كلام الأسطى ؟ ! كان ضربه بالكوريك اللي فى ايده على طول !!

وشـمـيد : دى الفاظ طالب جامعى .. صبي وأسطى وكوريك !!

نـاجـي : طبعاً الفاظ ما تعجيش سيادتك عشان بتضرب ع الوتر الحساس !!

نهيـلة : (متدخللة وقائلة بعصبية لنـاجـي) كفاية كده يانا نـاجـي !! مافيش داعى للتوتر ده !! كل واحد حر فى رأيه !! وأنا ما اعتقدش لو اشتغلت مع الأستاذ رشيد انه يرفض أفكارى لو كانت جديدة ومفيدة ؟ !

رشيد : (في سعادة غامرة لهلة) انتى تأمرى من دلوقت
يا ست الكل .. ده أنا راجل ديمقراطى ويعجبك
قوى وما يفهموش غير الديمقراطيين اللى زيہ ..
وعشان كده مكتبى فى الجورنال مفتوح لك من بكره!!
وتحت امرك فى أى وقت !!

لهلة : وأنا يشرفنى أجيلك من بكره يا أستاذ رشيد !!

ناجى : (ينظر فى حلق الى لهلة ثم يستدير بوجهه بعيدا
وهو يقول لنفسه بصوت عال) كان ظنى دايمًا
فى محله !

الشباب : (يترك مكانه فى الصف الأول ويصعد على المنصة
ليقول للجمهور) هم فى الخبرا دول اللى قالوا
عليهم ؟ ! بقى لنا أكثر من ساعة مستنيين ولحد
دلوقت ماحدثش جه !! حاتفصلوا ساكتين لحد
امتى ؟ ! حاتفصلوا طول عمركم كده متفرجين ؟ !

على : (ينفجر ضاحكا وهو يدق بقبضته على سور البنوار)
طبعا متفرجين .. آمال حانبقى مشخصاتية على
آخر الزمن ؟ !

(صوت خرخشة فى الميكروفون ثم يعود الصوت
مرة أخرى مدويا بطريقة مسرحية درامية)

الصوت : بشرى سيداتى .. ساداتى .. لقد وصل الخبراء
ومعهم أحدث أجهزة الكشف عن الأعطال
الالكترونية .. وهم الآن يرتدون ملابسهم الواقية
من الاشعاعات وسيكونون هنا بعد لحظات ..
ستعيشون لحظات تاريخية مع أحدث صيحات

التكنولوجيا .. فقد قرر كبير الخبراء أن يقوم مع مساعديه بإصلاح الجهاز أمامكم حتى تشاهدوا بأنفسكم الى أي حد تطورت تكنولوجيا المسرح .. وذلك على سبيل التسلية العلمية المفيدة .. وفي الوقت نفسه على سبيل الدعاية للشركة العملاقة التي تغطي كل عواصم العالم المتحضر .. وسوف يذهلكم أيضا بأخر الاكتشافات التي توصلت اليها شركته العالمية في مجال صنع الكمبيوتر الصغير الذي يمكن استخدامه للأغراض المنزلية .. سواء في غرفة المكتب أو الاستقبال أو النوم أو المطبخ أو الحمام .. وسيقص عليكم استخدامات هذه الأجهزة الدقيقة التي أصبحت الآن في متناول الجميع .. والآن هيا نستعد لاستقبالهم ..

(يهبط الشاب حائقا من على المنصة ليجلس في مقعده . وتعود الفرقة الى عزف نفس المقطوعة المتكررة ولكن بإيقاع سريع مع الاضواء التي تتراقص بشدة وعنف . ثم يخرج من الفتحة الموجودة بمقدمة المنصة الأستاذ رعد بنفس ملبسه المزركشة ثم يقف وقفة عسكرية منتصب القامة وناظرا الى الحفرة التي يصعد منها كبير الخبراء وهو يرتدى حلة صفراء من المشمع اللامع وعلى وجهه قناع أسود وعلى رأسه كسكته حمراء لامعة ، وعلى ظهره حرف A وفي يده حقيبة سوداء ضخمة . يحيى رعد الذي يرد التحية بعنف ويقف الى جواره . ثم يصعد المساعدون الأربعة بنفس الطريقة وبنفس

اللاس ، وقد كتبت على ظهورهم حروف
B.C.D.E. على التوالي . يصطفون في طابور
في مواجهة كبيرهم ورعد)

كبيرهم : (بلكنة اجنبية غير محددة) انضباط (يقفون حركة
الانتباه العسكرية)

تسيب (يقفون حركة الصفا العسكرية)

انضباط (حركة انتباه)

تسيب (حركة صفا)

انضباط (انتباه)

تسيب (صفا)

انضباط (انتباه) يالا . . . نشيد الشركة (يشير
للفرقة الموسيقية بأن تصاحب الخبراء وهم ينشدون
فتبدأ بالفعل ويعقبها الخبراء بلكنتهم الأجنبية
وبطريقة أوبرالية كاريكاتيرية)

الخبراء : احنا الخبراء . . احنا السفراء

احنا الخفراء . . احنا الكبراء

احنا العلماء . . احنا الحكماء

جايين من بلاد التكنولوجيا

وان قالوا علينا ماناخوليا

لكن حانعرفهم تبليط الشوارع

وفتح الستائر بدون موانع

وما فيش مكان للمنايع

سواء الشاري وللا البايح

دى دنيسا

دايره بالتكنولوجيا

واللى تفوته يبقى مات

وعلى ديله سبع لفات

مات ، سات ، كات ، بات ، فات .

على : (صائغا من الثنوار) على النعمة دول بتوع مترو الأنفاق !!

شويكار : وللا بتوع الفا ؟ !

وعبد : (صائغا كالرعد فى على) بس .. هس ..
ولا كلمة .. مش كل حاجة نفتى فيها !!

على : (يضع يده على فمه) خلاص .. اتكتننا ..

كبيرهم : (لرعد) سيبه يتكلم .. احنا بتوع الديمقراطية
وحقوق الانسان .. وروح الدعاية .. (ناظرا الى
مساعديه) واقفين بتعملوا ايه ؟ ! روحوا فكوا
الكومبيوتر وهاتوه هنا (يسرون فى طاوور عسكرى
حتى الحفرة ويهبطون فيها بنفس الطريقة التى
صعدوا بها . وعندما تغلق الحفرة مرة اخرى
وتستوى براضية المنصة ، يخاطب كبير الخبراء
الجمهور) دعبال ما يجيبوا كومبيوتر الستارة ،
يسرنى ان اقدم نفسى وشركتى ليكم .. واعرفكم

أوجه نشاطها الى بتغطى معظم دول العالم
وخصوصا الدول المتخلفة الشبيهة بالنامية .. أولا
أنا كبير خبراء شركتنا في الشرق الأوسط كله ..
واسم شركتنا صعب شوية .. حتى الحروف الأولى
منه كثيرة .. لكن ما بدعاش .. لازم الاسم يجمع
بقدر الامكان معظم أنشطة الشركة .. اسمها
T.O.Z — F.I.S.H. Group وكل انشطتها
الكترونية .. بنشتغل في المسارح والبيوت
والمطاعم والشوارع .. في كل حة ما خلناش ..
وكمان بدأنا في فتح سلسلة بنوك في كل أنحاء العالم
بنظام الكتروني عملناه ليها مخصص .. وكمان
سلسلة مطاعم بيتزا وهامبورجر .. الزبون يدخلها
مرة يقوم يتلحس عليها .. يدمنها .. يجيلها من
آخر الدنيا .. ويقف في الطابور بالساعة .. مش
مهم الشمس في الصيف ولا البرد في ليالي الشتا ..
المهم يطلع منها بالساندويتش اللي اصبحت كل امله
في الحياة .. احنا صحيح نظامنا الكتروني صارم ..
لكن برضه بنريح الناس على قد عقولها .. وعشان
كده كل يوم تفتح فرع جديد لحد ما بقت فروعنا
في كل حارة وفي كل زقاق .. كل ده والناس
مدهولين وبيسألوا هم بييجيوا الفلوس دي كلها
منين ؟ ! وقصدهم ايه بالطبط ؟ ! طبعا أسئلة تدل
على السذاجة .. لأننا كنا أول من طبق مبدأ يا بخت
من نفع واستنفع .. واللى يدفع قرش يرجع له
اتنين .. وهو مستريح لا تعب ولا فكر ولا عمل
حاجة أبدا !! أظن بقى مافيش خدمات أجمل وأعظم

وأروع من كده .. هدفنا هو سعادة الناس لدرجة
النشوة ان أمكن .. يعنى شايلين همهم ليل نهار ..
وهم ولا على بالهم !!

الشاب : (يقف متحفزا مواجهها كبير الخبراء) يعنى رزق
الهيل ع المجانين .. يتضحكوا على عقول الناس
وبتعلموهم التنيلة والكسل والغباء ؟ !

كبيرهم : (بمنتهى الهدوء والسخرية) الكلام ده يا بنى سمعناه
كثير قبل كده من أمثالك أعداء التكنولوجيا
والاستثمار والانفتاح والحياة على مستوى العصر ..
لكن الحمد لله .. الكلام ده مالوش تأثير على
معظم الناس اللى هيلتهم مشروعاتنا اللى زغللت
عينهم .. ودخلتهم عصر التكنولوجيا !!

الشاب : التكنولوجيا يا سيادة الخير مش مجرد آلات
والكترونيات بتستورد م الخارج .. لأنه لابد
أولا من تربية العقول اللى حاتستخدم التكنولوجيا
وتطورها عشان تناسب بيئتها المحلية .. وعشان
كده انا من أشد أنصار العقلية التكنولوجية
تحمسا .. ومن الد أعداء الاستعمار التكنولوجي !

كبيرهم : الاستعمار التكنولوجي ؟ ! أول مرة أسمع تعبير
غريب زى ده .. دى دعايات الأعداء !!

الشاب : (بيروود) اهدأ شوية .. وسبيك م الألفاظ
الكبيرة .. ده انت راجل بتاع الكترونيات وكل كلمة
عندك لازم يكون ليها حساب .

كبيرهم : (فى استسلام مغيظ) اتفضل !

الشباب : الاستعمار التكنولوجي معناه انكم توردوا لينا الآلات

من غير ما ندرك العقلية التي ابتكرتها .. معناه
انكم تبهرروا الناس السذج بمظاهر جوفاء مالهش
علاقة بجوهر التكنولوجيا .. تصور قد ايه يبقى
البنى آدم تافه وهافف لما يصبح كل امله وسعادته
ومتعته في الدنيا انه ياكل ساندويتش هامبورجر
ولا حنسة بيتزا .. ولا يشرب ازازة كازوزة ..
ولا ياخذ لحسة آيس كريم !! هي دي السعادة
لدرجة النشوة التي بتتكلم عنها .. انتوا في الحقيقة
ههدفكم هو غيبوبة الناس ان امكن .. عاوزين
تعودونا على أنماط ووسائل ما نقدرش نستغنى
عنها بعد كد .. وبكده نفضل تحت رحمتكم ..
وعاجزين تماما عن الابتكار والاعتماد على نفسنا ..
وكفاية مهزلة الليلة عشان مجرد فتح ستارة .

وعسىد : (صارخا كالرعد) كفاية يا سيد .. انت بتتكلم كلام

مش فاهمه .. عجلة التكنولوجيا لازم تتقدم ..
وحاندوس في طريقها أى واحد بيحاول يتصدى
ليها !!

الشباب : احنا بس شاطرين في الكلام الكبير اللي بنردده زى

البغبنات .. نفسى ألاقى واحد متحمس لكلام هو
فاهمه !!

كبيرهم : (بهدوء وثقة) احنا بنرحب بكل الآراء .. لكن

ماعندناش وقت للشطحات .. الآراء لازم تيجي من
خبراء على مستوانا العلمى .. ومع ذلك بنرحب

بكل الآراء .. عشان احنا بتوع الديمقراطية وحقوق
الانسان !!

الشاب : عموما انا كلامى موجه للناس الطيبين القاعدين
فى المسرح .. لأننى فى الواقع مالباش كلام معاكم .

المجوز : (يجذب الشاب من يده الى أن يجلسه الى جواره)
يابنى ربح روك ٠٠ كان غيرك أشطر !! ما فيش
أحسن م الواحد يفضل متفرج العمر كله ٠٠ عمر
المتفرجين ما حصلهم حاجة ٠٠ لكن الأبطال
ع المسرح همه وحظهم !!

كبيرهم : (للمجوز) يا سلام على حكمة الستين !! نفسى يفهم
الحكم دى !!

الشاب : عمرى ما حابقى متفرج !! الواحد بيعيش حياته
مرة واحدة بس !

رعد : (لكبير الخبراء) سيبك منه !! احنا حانضيع الليلة
فى الكلام الفارغ ده ولا ايه ؟ ! مش كفاية اللي ضاع
منها !! الوقت ده ملك الجمهور ٠٠ وغير مسموح
لاى انسان مهما كان انه ياخذه لحسابه الخاص !

كبيرهم : عندك حق ! (يميل على حقيبتة السوداء الالامعة
ويفتحها ويخرج منها أجهزة دقيقة يرصها خارجها
الواحد الى جوار الآخر) وعشان أثبت لكم عمليا
ان الشاب ده - مع حبى الشديد له - مش فاهم
الكلام اللي قاله (يرفع جهازا دقيقا مثل اللعبة فى
حجم كف اليد وبه أزرار كثيرة) يعنى ده مثلا

كوميبيوتر للبيت .. وانت قاعد في اى حصة تقدر
تفتح بيه وتقفل اى ستارة من غير ما تتحرك ..

الشباب : (يقف ساخرا) دى الستارة هى اللى مش حاتتحرك!

كبيرهم : أرجوك .. ادينى فرصة أتكلم زى ما اديتك !!

الشباب : (يجلس في سأم) متأسف !

كبيرهم : (يضع الجهاز الدقيق ويرفع جهازا آخر له شكل

مختلف وأكثر دقة) ونظرا لتخصص شركتنا في

تكنولوجيا المسرح .. فالجهاز ده ممكن ينجح

الكوميديا الساقة !!

ناجي : (من البنوار بصوت عال) ازاي ؟ !

كبيرهم : (يسعد نلسؤال والتجاوب) قلت لى ازاي ؟ !

قالك ايه ؟ ! قالك آه !! تذكره أبو داود اللى تنزل

الدرد !! (ينفجر ضاحكا) عشان أوريكم انى حافظ

مصر وعارفيها أكثر منكم !! (ينفجر على ضاحكا معه

وكذلك وعسد) ان حا اشرح كل حاجة بمنتهى

الصراحة .. احنا بتوع الديمقراطية وحقوق

الانسان .. أما بالنسبة للجهاز ده (يشير اليه

باصبعه وهو يتمله على كفه) اللى بينجح الكوميديا

الساقة .. فده اكتشاف خطير وجديد خالص ..

وليكم حق تسألوا « ازاي » زى الشاب اللطيف

ده اللى قاعد في البنوار .. الجهاز ده قادر على

ارسال ذبذبات دقيقة جدا الى بطن المتفرجين في

المسرح سواء في البناويز أو الصالة أو أعلى

التياترو .. بحيث يخليهم مسخسخين م الضحك

حتى لو كانت الكوميديا في منتهى السخافة والتفاهة
وتقل الدم ... وأى ناقد يحضر عرض زى كده
ويسخسخ هو كمان مش ممكن حايقول في نقده
وعرضه للمسرحية الا انها قنبلة الموسم ... والجمهور
طبعا حا يقبل ع المسرحية وصاحب المسرح حايبقى
مليونير ... وبالمنااسبة حا أقولكم سر انهارده ...
فيه أكثر من مسرح قطاع خاص اشترى منها
الجهاز ده .

نساجي : والجهاز ده اسمه ايه ؟ !

كبيرهم : يا سلام على ظرف الشاب ده وظرف أسئلته ...
الجهاز ده اسمه « المسخسختايزر » ... لكن لازم
اصارحكم وأقولكم انه ثبت له خطرين بنحاول الآن
في معامل الشركة اننا نتفاداهم حرصا على صحة
المتفرجين (ينظر الى المتفرجين مدققا) أنا شايف
حب الاستطلاع حايضط من حبابي عنكم ... حاضر
حا أقول كل حاجة ... الخطر الأول انه ثبت ان
اللى بيستخدم الجهاز أكثر من مرتين ثلاثة بيتعود
عليه لدرجة الادمان ويمكن يفضل مسخسخ لحد
ما يموت ... بعد الشر عليه طبعا ... وعشان كده
احنا بنحاول ننتج جهاز معدل فيه ذبذبات مضادة
ممكن تشفى المدمن من ذبذبات السخسخة ...
ونرجو اننا نتحكم في الذبذبات المضادة ... عشان
دى ذبذبات الهم والغم اللى ممكن تخليه بصوت
ويلطم ويندب زى الندابات ... وأنا شخصيا كنت
قدمت اقتراح في اجتماع مجلس الادارة الأخير

اقترحت استخدام الذبذبات المضادة في مسرحيات
التراجيديا والميلودراما عشان يمان مدى تأثير
المسرحية على الجمهور الى قاعد بيعيط وينوح ..
وعموما ادرج الاقتراح في محضر الجلسة على اساس
الاخذ به بمجرد انتاج الجهاز الجديد ذو الذبذبتين
على مستوى تجارى .

وشيد : لكن سيادتكم ما قلتناش عن الخطر الثانى الى ممكن
يتسبب فيه الجهاز .. وكم ان ما عرفناش تمنه !!

كبيرهم : (ضاحكا في سعادة بالغة) صحيح الكلام خدنا ..
لكن كويس سيادتكم فكرتنى !! حضرتكم بتشتغل
ايه ؟ !

وشيد : (ناهضا في سعادة ومطلا من سور البنوار)
رئيس القسم الادبى بجريدة « نجوم الليل » !

كبيرهم : يا محاسن الصدف .. اهى فرصة عشان سيادتكم
تكتب عن الأجهزة الجديدة !!

وشيد : طبعا .. طبعا .. ده يشرفنى (مستندرا) ويشرفنى
كم ان اقابل حضرتكم بعد العرض في حديث خاص !!

كبيرهم : وخاص جدا كمان .. انا تحت امر كل عشاق
التكنولوجيا .. عموما ثمن الجهاز نص مليون
دولار !!

ناجى : (مندهشا) ياه .. الجهاز الصغير ده بالثمن ده !

كبيرهم : الحكاية مش حكاية حجم .. ثم ان النص مليون
ده .. حايجيب ملايين .. بعض اصحاب المسارح

اللى استخدموا الجهاز ده أصبحوا مليونيرات ٠٠
وأنقذهم م الافلاس ٠٠ هم مش هيل عشان
بصرفوا نص مليون دولار فى الفاضى !!

وشسيد : ممكن بقى نعرف الخطر التانى اللى ممكن ينتج عن
الجهاز ؟ ؟

كبيرهم : الخطر التانى يا سيدى ان كل انسان له طاقة فى
الضحك ٠٠ فيه واحد يقدر يضحك خمس دقائق
ويتعب بعدها ٠٠ وفيه واحد يقدر يضحك ساعة ٠٠
وفيه واحد يقدر يضحك ليلة بحالها ولا يتهدش ٠٠
لانه لو زاد استخدام الجهاز اكثر م اللازم ممكن
يخللى اصحاب النفس القصير يفرقروا فى المسرح ٠٠
وعشان كده احنا برضه فى معاملنا بنحاول ننتج
جهاز معدل يتحم الكترونيا فى مدى ذبذبات
السخسخة بالنسبة لكل متفرج على حدة على أساس
الموجات الصادرة من بطنه للجهاز ٠٠ يعنى العملية
حتبقى ارسال واستقبال فى الوقت نفسه ٠٠ مش
مجرد ارسال بس ٠٠ ولحد ما ننتج الجهاز ده
بنشترط على اى عميل يشتري الجهاز ٠٠ انه بيعت
الأول اللى حايشتغلوا عليه عشان ياخدوا كورس
تدريب عليه عندنا ٠٠ زى رعد بك اللى أصبح خبير
الستائر الالكترونية (يربت على كتف رعد الذى
يبتسم فى سعادة) عشان يعرفوا أنسب فترات
لاستخدامه ٠٠ من حيث الطول وفترات الضحك ٠٠
عشان مش معقول تبقى الستارة مقفولة مثلا ٠٠

والجمهور مسخسج ٠٠ أو البطل عيان وحالته تصعب
ع الكافر ٠٠ والجمهور مسخسج !!

الشباب : (ناهضا ومواجهها كبير الخبراء بنفس التحدى)
أنا مش مصدق كلمة واحدة م اللي يتقوله !!

كبيرهم : يا بنى ٠٠ انت فيه حد مسلطك على ؟ !

الشباب : اذا كنت عارف المثل اللي بيقول يا بخت من نفع
واستنفع ٠٠ تبقى عارف المثل اللي بيقول الميه
تكذب الغطاس ؟ !

كبيرهم : طبعاً ٠٠ عارفه !

الشباب : طيب ياللا ٠٠ ورينا همتك !

كبيرهم : يعنى عاوز تجربة عملية دلوقت ؟ !

الشباب : احنا ماورانا ش حاجة ٠٠ الستارة مقفولة وحانفرع
م الملل !!

كبيرهم : (للجمهور) ايه رأيكم فى الكلام ده ؟ !

أصوات : (همهمة من الجمهور تتضج بسرعة) عاوزين
نشوف ٠٠ عنده حق !!

كبيرهم : وهو كذلك ٠٠ (يرفع الجهاز على يده ثم يضغط
على بعض أزراره فتصدر عنه أصوات الكترونية
مضحكة ، لكن أحدا لا يضحك)

الشباب : (لا يزال واقفاً في تحد) يعنى ما حدش ضحك ؟ !

كبيرهم : (فى سأم) يا سيدى أصبر ٠٠ الأصوات دى
معناها انى باضبط الجهاز ٠٠ لكن اللي بيضحك

بعد كده الذبذبات اللى ماحدش بيسمعا ٠٠ هو بس
بيحس بيها في بطنه ٠٠ (للشاب) ممكن تقعد وتريح
بالك !

الشاب : مش حا أقعد الا لما أشوف بنفسى الاختبار
العملى !!

كبيرهم : خلاص ٠٠ خليك واقف (يعود الى ضبط الجهاز
الذى يصدر الأصوات الإلكترونية المضحكة ثم
يصمت تماما) والآن استعدوا (سكون تام ثم يمسك
رعد بطنه وهو يبدأ في الضحك الذى سرعان ما يتحول
الى قهقهة)

الشاب : (صائجا بصوت عال) انت متفق معاه وجاين
تضحكوا علينا ؟ !

كبيرهم : يا سيدى اصبر ٠٠ انت لسه شفت حاجة ٠٠

(يشرع على في الضحك ثم القهقهة ثم تتبعه شويكار
ونهلة ورشيد وناجي والعجوز الذى ينهض وينتفض
ضاحكا عندما يهدر السرح كله بالضحك في حين يقف
الشاب صامدا يقاوم قدر طاقته الضحك وينظر
في تحد بالغ الى كبير الخبراء الذى يبادلته تحديا
بتحد ، ويركز عليه الجهاز ، وبمرور اللحظات
يبدأ الشاب في الاستسلام للضحك برغم مقاومته
العنيفة ثم ينفجر ضاحكا ثم مقهقهة لدرجة أنه يتلوى
في وقفته فيسرع الى الجلوس لكنه لايزال ينتفض
ضاحكا ، وكبير الخبراء ينظر اليه في تشف واضح ،
ويواصل ضغط اصبعه على الجهاز الصغير في يده .

ثم يرفع أصبعه من على زر الجهاز فيبدأ الضحك في
الهدوء والخفوت باستثناء ضحكات هنا وهناك في
حين يقع العجوز على الأرض فيسرع الشاب بعد أن
يستعيد تحكمه في نفسه إلى رفعه من على الأرض
واجلاسسه مرة أخرى إلى جواره .

كبيرهم : (للشاب) هيه .. أدبك شفت بنفسك !!

الشاب : أنا أعرف أن الضحك إحياء وعدوى تنتقل من
واحد لواحد زى النار فى الهشيم .. وانت فضلت
توجه لي أنا بان الجهاز ده بيضحكنا لدرجة
السخسة .. واحنا جايين مستعدين طبيعى عشان
نضحك على أى حاجة .. فلما أصدرت أمرك للعقل
الباطن بالضحك .. بدأ واحد أو اثنين بالضحك ..
وبسرعة انتقلت العدوى للجميع زى ما حصل .

كبيرهم : يعنى مافيش فائدة فى مقاوحتك !! يعنى أنا فى
نظرك منوم مغناطيسى .. ليس الا ؟ !

الشاب : تمام .

كبيرهم : ده على كده سرى باتع بقى وأنا مش دريان ؟ !

الشاب : مشكلتك انك دريان أكثر م لازم !!

كبيرهم : عموما زى ما بتقولوا .. الميه تكذب الغطاس !!

الشاب : تمام .

كبيرهم : طب ولو ضحككتهم انت بنفسك لدرجة السخسة
فعلا .. يبقى إيه رأيك ؟ !

الشاب : تمام .

كبيرهم : وزيادة في التحدى انا حا اهدى الجهاز للمتفرج
اللى حا يقدر يمسك نفسه م الضحك !! (يشير
للشاب) اتفضل هنا جنبى وجرب بنفسك !!

الشاب : (يصعد في خفة ونشاط ليقف الى جوار كبير
الخبراء الذى يضع ذراعه على كتفه في ود مبالغ
فيه ، لكن الشاب يرفع ذراعه من على كتفه
قائلا له) وأنا حا أعمل ايه دلوقت ؟ !

كبيرهم : أبدا .. ولا حاجة .. (يمد يده اليه بالجهاز)
امسك الجهاز ده ودوس ع الزر ده !!

الشاب : (يمسك بالجهاز) بس كده ؟ !

كبيرهم : هى دى معجزات التكنولوجيا !! ياللا .. واحد ..
اثنين .. ثلاثة ..

(الشاب يضغط على الزر فيبدأ رعد في الضحك
ثم يعقبه الجميع في ضحك هيسترى هذه المرة ..
وتتضاعف هيسترى الضحك الى أن يسقط المعجوز
مرة أخرى على الأرض لكن بلا حراك هذه المرة ..
يلاحظ كبير الخبراء المعجوز يرفع يد الشاب من
الجهاز ويخفت الضحك تدريجيا الى أن يتلاشى ..
يسرع كبير الخبراء الى إعادة المعجوز الى مقعده
لكنه يفاجأ به فاقد للوعى في حين يقف الشاب
حائرا خلف كبير الخبراء)

كبيرهم : (ينحنى على المعجوز ويقيس نبضه ثم ينظر الى
الشاب) اطمئن .. ده مغى عليه بس .. وأنا
حا أفوقه حالا .. عندى كومبيوتر لكل حاله ..

(يخرج من جيبه جهازا أصغر حجما ويسلطه على صدره ثم يضغط على الزر فنسمع شهيقه وزفيره عاليين في الميكروفون مثل منفاخ ضخيم يمتلأ بالهواء ويطرده • ثم ينهض العجوز من تلقاء نفسه في حيوية ابن العشرين ليقف في مواجهة الجمهور الذاهل وهو يصيح في كبير الخبراء)

العجوز : ما تشغل الضحكة حبتين •• خيلنا نعرفش يا راجل !!

كبيرهم : (للشباب) هيه !! لسه عندك اعتراض ؟ !

الشباب : آمال أنا ماضكتش ليه ؟ !

كبيرهم : عشان انت اللي مشغل الجهاز •• كل اللي بيشفلوا الجهاز أو واقفين وراء مش ممكن يضحكوا •• لأنهم لو ضحكوا مش حايعرفوا يشغلوه •• آمال •• دى تكنولوجيا محسوبة بأقل م الملى ! ؟ لسه عندك اعتراض تانى ؟ !

الشباب : حتى لو كان عندى •• حاحتفظ بيه لنفسى !!

كبيرهم : (بحسم) لأنك ماتقدرش أو مكسوف تقوله قدامنا •• يبقى نقدر نعتبر الاعتراض ده غير موجود أساسيا !!

على : (من البنوار لكبير الخبراء) اعتراض ايه يا خواجه ؟ ! هو فيه أمتع من كده !! ده الواحد ضحك لحد ما قلبها مسخرة !! تانى وحياة أبوك يا خواجه !! احنا كنا فين وبقينا فين ؟ !

(يصعد من الحفرة المساعدون واحدا بعد الآخر بحيث يصعد رابعهم وفي يده جهاز صغير يقدمه لكبيرهم)

مساعد ٤ : دخنا عبال أما فكينا (يمسح عرقه) •

كبيرهم : طابور الأول يا مساعد ٤ .. انت نسيت النظام ولا إيه ؟ !

(يصطف الأربعة كتفا الى كتف في مواجهة كبيرهم ورعد الى جواره سعيد بكل ما يجري) انضباط (حركة انتباه) تسبب (صفا) انضباط (انتباه) تسبب (صفا) ..

(بصوت عال صارم) تقرير عاجل عن الحالة ؟

مساعد ١ : (يتقدم مشيرا الى الجهاز الذى أخذه كبيرهم من مساعد ٤) درسنا الحالة يا باشا .. اكتشفنا ان عدم انتظام التيار الكهربائى في المنطقة أدى الى خلل في بعض الدوائر الكهربائية •

كبيرهم : يعنى العيب مش في صناعتنا ؟ !

مساعد ٢ : اطلاقا يا فندى !

كبيرهم : وليه ماضمتوش للعملية كلها جهاز منظم للتيار .. أقصد Stabilizer ؟ !

مساعد ٣ : مش ممكن يا فندم !

كبيرهم : ليه يا مساعد ٣ ؟ !

مساعد ٣ : لأن ال Stabilizer اللى في شركتنا بينظم التيار ما بين ٢٢٠ فولت و ٢٤٥ فولت .. لكن التيار

في المنطقة دي ساعات بيوصل لـ ١٥٠ و ١٢٠ فولت
وساعات بيتقطع خالص ٠٠ يبقى ساعتها لا فيه
ستارة حاتتفتح ولا حاتتقفل !!

كبيرهم : يعنى العيب مش فى صناعتنا ؟ !

مساعد ٢ : اطلاقا ياغندم !!

كبيرهم : طيب ٠٠ ادينى جهاز الكشف والاختبار !

(مساعد ٤ يسرع ويلتقط جهازا صغيرا للغاية من
طابور الأجهزة الصغيرة المخصوصة أمام كبيرهم .
يقترّب منه مساعد ١ الذى يحمل كومبيوتر الستارة)

كبيرهم : (لمساعد ٤) ادينى الزاوية الحادة !

مساعد ٤ : (يشكل زاوية حادة مع مساعد ١ فيحدث الجهاز
أصواتا إلكترونية مضحكة ٠٠ وتتلاعب الستارة
فوق المنصة كما لو كانت مدفوعة برياح شديدة
من داخل المنصة ومع ذلك لا تنفتح)

كبيرهم : طيب ادينى الزاوية المستقيمة ؟

(مساعد ٤ يشكل زاوية مستقيمة مع مساعد ١
فيحدث الجهاز أصواتا إلكترونية مختلفة لكنها
مضحكة أيضا . وتتلاعب الستارة بحيث تأخذ شكل
الزاوية المستقيمة كما لو كانت مدفوعة بزاوية
مائدة ضخمة ومع ذلك لا تنفتح)

كبيرهم : طيب ادينى الزاوية المنفتحة !!

مساعد ٤ : قصدك الزاوية المنفرجة ياغندم ؟ !

كبيريهم : انت نسيت احنا في عصر الانفتاح ولا ايه ؟

مساعد ٤ : (متذكرا) آه .. آسف يا فتيم (بشكل زائفة
منفرجة مع مساعد ١ فيحدث الجهاز أصواتا إلكترونية
مختلفة وجديدة لكنها مضحكة أيضا .. وتتلاعب
الستارة فوق المنصة بحيث تأخذ شكل الكرة
الضخمة أو بطن المرأة الحامل في شهرها التاسع ..
ومع ذلك لا تفتح)

كبيريهم : خليك على كده (يفتح حقيبة صغيرة ويخرج منها
سماعة طبيب يضعها على أذنيه ويبدأ في الكشف
بها على بطن الستار المتفتح كما يكشف الطبيب على
المرأة الحامل وهو يضع السماعة على بطنها ويطلب
عليه بيده .. ينظر إلى مساعد ٤) كفاية كده ..
ابعد عن مساعد ١ .. أحسن الستارة في التاسع ..
وفيه احتمال تنفجر والمسرح كله يسقط !!

عسلى : (صائحا مصفقا) ان شاء الله ربنا حايثنا
بالسلامة ويديها ساعة سهلة .. وتخلف لنا ستارة
صغنتوتة !

وعسلى : (صائحا في عسلى) بس .. هس .. ازاي يا جدع
انت تقول الكلام ده واحنا عايشين في قمة من قمم
التكنولوجيا ؟ !

عسلى : (لرعد) آسفين يا قومندا !

كبيريهم : (للجمهور) ده بيكرنى بجهاز أنتجه شركتنا
للولادة ويعمل بالتحكم عن بعد .. يعنى
بال remote control .. ويخلي طبيب واحد

في المستشفى يولد خمس ست سنات في وقت واحد
وهو قاعد في أودته ٠٠ من غير ما يعقم ايديه ولا يلبس
جوانتي ولا حاجة !!

الشباب : (لكبير الخبراء) المهم الستارة حاتفتح ولا لا ؟ !

كبيرهم : لو فشلت في فتحها ٠٠ يبقى السبب التيار الكهربائي
غير المنتظم في المنطقة ٠٠ اضبطوا الأول تياركم على
تيارنا واحنا تحت امركم !

الشباب : يعني ممكن ماتفتحش خالص ٠٠ والليلة تروح
علينا هدر ؟ !

كبيرهم : الدول النامية دايا كده ٠٠ تحب ترمي بلاويها
علينا !!

الشباب : وانتو ماكتنوش عارفين كده لما جيتوا تسوقوا
اجهزتك عندنا ؟ !

كبيرهم : ماكناش نتصور أن التيار ممكن يلعب بالشكل ده!؟
ده التيار عندنا لو نزل ولا طلع فولت واحد
ولا فولتين ٠٠ من حق المشتريين انهم يطالبوا
الكوبانية بتعويض على طول !!

الشباب : يعني المهم في نظركم ان العيب مش في صناعتم ؟ !

كبيرهم : (بمنتهى الثقة) طبعا ٠٠ هي دى عاوزه كلام !!

الشباب : يعني العيب فينا احنا بس ؟ !

كبيرهم : والله كللكم نظر !

الشباب : وانتو عداكم العيب ؟ !

كبیرهم : (بتواضع) أخجلتم تواضعنا !

الشباب : یعنی الستارة خلاص مش حاتفتفتح ؟ !

كبیرهم : احنا حانجرى تجربة بال Ultrasonic ٠٠ اذا مانجحتش يبقى لازم نبعث الجهاز للمركز الرئيسى لتغير دوايره الكهربائيه كلها !

الشباب : طيب اذا كان الكمبيوتر منفصل دلوقت عن الستارة ٠٠ يبقى تقدر تفتحها عادى بالحيال ؟ !

كبیرهم : (مستنكرا جهله) يا سيد ٠٠ عشان اوريك انك جاهل ٠٠ الستارة الكترونيه بالضبط زى الكمبيوتر ٠٠ ومش ممكن تنفصل عنه ٠٠ ومش ممكن تفتح الا بيه !!

الشباب : واذا حاولت ؟ !

كبیرهم : يبقى ذنبك على جنبك ٠٠ وانا باعلن عدم مسؤوليتى عنك قدام الناس كلهم !

الشباب : طيب اتفضل جرب ال Ultrasonic بتاعك !

كبیرهم : برافو عليك ٠٠ نطقها صح !

الشباب : اياك تكون فاكرنا جهلة ٠٠ احنا عارفين كل حاجة كويس ٠٠ بس محتاجين لتنظيم مجهوداتنا عشان نبقى قوة وطاقة حقيقية يتعملها حساب .

كبیرهم : (يتجاهله تماما ويقول لمساعد ١) هات جهاز ال Ultrasonic .

(مساعد ١) ينحنى ويلتقط جهازا دقيقا ويقدمه لكبیرهم الذى ياخذه ويوجهه الى الستارة ضاغطا على

زر فيحدث صوتا رفيعا يصم الأذان لدرجة أن
الحاضرين يسدون آذانهم بأيديهم . وتبدو على
الستار بعض المحاولات لفتحه ، لكنه لا يفتح ويتحول
الى موجات متتابعة كامواج البحر الراقصة
مما يغرى الفرقة الموسيقية بعزف مقطوعة فالس
الدانوب الأزرق التي تتمشى مع تموجات ورقصات
الستار) مافيش فايدة (يبطل كبير الخبراء الجهاز
فيتوقف الستار عن الرقص وكذلك تتوقف الفرقة
عن العزف) . مافيش فايدة . لازم نبعث
الكومبيوتر للمركز الرئيسى . (يبدأ فى اعادة كل
الأجهزة الصغيرة فى الحقيبة السوداء الالامعة
بمساعدة المساعدين الأربعة . وبعد الانتهاء من
ترتيب الحقيبة وقلها ، يحملها مساعد ٤ ويقف
المساعدون طابورا ويصيح فيهم كبيرهم)
انضباط . . . تسبب . . . انضباط . . . تسبب . . .
انضباط . . . انصراف (يبدأ المساعدون فى الانصراف
هابطين فى الحفرة واحدا بعد الآخر وفى أعقابهم كبيرهم
ثم رعد ، رشيد الساكت ينسحب من البنوار)

(صوت خرخشة فى الميكروفون ثم يأتى الصوت)

الصوت : سيداتى . . . ساداتى . . . نأسف لهذا العطل المفاجئ
والمزمن . . . وكنوع من تعويض هذا المأزق الذى
وقعنا فيه جميعا بحسن نية . . . ستقوم فتيات
ساحرات بتوزيع قطع البيتزا وساندوتشات
الهامبورجر والايس كريم والكازوزة عليكم بنصف
التمن فقط . . . ثم يعقب هذه المأكولات والمشروبات

والمشروبات التي حاتكلوا صوابكم وراها أكل زى
ما بتشوفوا في اعلانات التلفزيون ٠٠ فقرة يقدمها
لكم النوم المغناطيسي العالمى حلمى النعسان ٠٠
وسيقرا الطالع لمن يرغب فيكم سواء في الكف
او الفئجان ٠٠ وهو ماهر أيضا في ضرب الودع
وتبين زين ونحط في الودع (مقلدا نداء صاربات
الودع) ٠

الشباب : « ينهض صارخا بأعلى صوت » كفاية بقى دجل
وضحك ع الدقون ٠ انت بتعمل كده عشان تهرب
م الحساب ، لكن ده بعدك ٠٠ أى نصاب حايشش
المسرح هنا حاتقطع رجله على طول ٠٠ أما تشوف
آخرتها ايه وياك ؟ !

الصوت : (متصنعا الضحك) انت بتفكرنى بأغنية عبد الدهاب:
« أنا والعذاب وهوأك » ٠٠ تحب تسمعها ؟ !

الشباب : ماتحاولش تحور الكلام !!

الصوت : هدى أخلاقك ٠٠ من غير عصبية ٠٠ قوللى انت
عاوز ايه بالظبط وأنا تحت أمرك ؟ !

الشباب : (بسخرية متسائلة في مرادة) يعنى مش عارف
احنا عاوزين ايه ؟ ! عاوزين الستارة دى لازم تتفتح
الليلة ٠٠ بالدوق بالعافية ٠٠ حتى لو صورنا
فيها قتيل !!

الصوت : حيلك ٠٠ حيلك ٠٠ واشمعى انت الى مجروق قوى
كده ٠٠ ما الكل ميسوطين أهو ٠٠ حد فيكو كان
يحلم بالمسختنايزر الى خلاكم تضحكوا قد الى
ضحكتوه طول عمركم ٠

الشاب : قلت لك ماتحاولش تحور الكلام .. وكمان ماتحاولش توقع بينى وبينهم عشان أنا واحد منهم وهمه فاهمنى كويس !

الصوت : يبقى بصراحة بقى أنا مش مسئول عنك لو حاولت فتح الستارة !!

الشاب : انت عاوز تخوفنى زى الجدد بتاع المسخسختايزر!! لكن الكلام ده مش ممكن يتخيل على !!

الصوت : والله انت حر .. ولقد أعذر من أنذر !!

الشاب : أنا حاثبت انك نصاب انت واللى جايهم (ينهض مسرعا ويصعد الى المنصة نحو الستار)

الصوت : (صارخا) ارجع يا مجنون حاتودى نفسك فى داهية !

الشاب : (يواجه الجمهور) بلاش دجل .. كفاية بقى .. أنا مش عارف ازاي سكتتنا الساعتين دول ع الدجل ده !! ازاي خالت علينا حكاية الستارة دى ؟ ! اذا كان مجرد فتح الستارة خد مننا الهبصة دى كلها ولسه مقفولة .. آمال لو كانت اتفتحت .. كانت المسرحية نفسها خدت مننا قد ايه ؟ ! اظن كنا قعدنا نتفرج للسنة الجاية !! (ينظر الى سقف المسرح موجها كلامه الى الصوت) يعنى مايردش !!

(يستدير معطيا ظهره للجمهور ويدخل يديه بين فتحتى الستارة محاولا فتحها بمنتهى القوة لكن طرفى الستارة بيدوان كأنهما صنعا من حديد . يستمر فى

محاولته المستميتة الى أن يحدث فتحة يدخل فيها
رأسه ليرى ما وراء الستار لكن طرف الستار يطبقان
على عنقه ويفشل في إبعادهما عنه فيصرخ صرخة
عارمة مستغيثا بالحاضرين (الحقونى !! الحقونى !!
حا اتخنق !! حا أموت !!

الصوت : (بطريقة جهودية ميلودرامية) لقد أعذر من انذر !!

الشاب : (يستمر في الصراخ) الحقونى .. حا اتخنق ..
حا أموت ..

(على يقين من على سور البنوار وكذلك ناجى . على
يقف على يمين الشاب في حين يقف ناجى على يساره
ويمسكان بطرف الستارة ويشدانها بكل قوتها حتى
يخرجا عنق الشاب ورأسه من بينهما بالكاد فيرتدى
بين ذراعيهما وقد أمسك بعنقه قائلا بصوت مبحوح)
كنت حا أموت .. أنا مش مصدق الى حصل
(لا يزال يتحسس عنقه) أنا مش مصدق الى
حصل !! زى ما يكون فيه قوة شريفة متربصة
بأى حد يحاول يعريبها ويكشفها !

ناجى : شفت ايه ورا الستارة ؟ !! ..

الشاب : هو أنا لحقت أشوف حاجة .. ده أنا يدوبك دخلت
رقبتى .. لقيت كل حاجة بياض فى بياض .. وبعد
كده الدنيا اسودت فى وشى تماما ومادرتش
الا بصواب من حديد طابقة على رقبتى !!

ناجى : وتفسير الظواهر الغريبة دى بايه ؟ !

الشباب : حاجة تجبر العقل فعلا !! الموضوع كان على وشك انه يوصل لخنقي فعلا !!

علي : أنا بأفكر اشترى ثلاث ستاير من النوع العجيب ده ٠٠ كل ستارة لحماية من حمواتي الثلاثة !!

(ينفجر ضاحكا)

شويكار : (من البنوار بصوت عال) اطمن يا علي بك ٠٠ أنا أمي ميتة من زمان !!

علي : (يتجاهلها تماما قائلا للشباب) المهم سلامتك انت ٠٠ وتاني مرة ابقى ابعد عن الشر وغنى له !!

الشباب : ما احنا لو تجاهلنا الشر هو مش حايجاهلنا !!

ناجي : لكن لازم نشوف طريقة ذكية وعلمية نواجهه بيها ٠٠ لكن اذا أصرينا على مناطحته مش حايبنونا الا كسر الدماغ !

علي : المسألة لا عاوزه ذكاوة ولا علم ولا حاجة ٠٠ دي عاوزه فهلوة ومفهومية ٠٠ اذا كان اللي قدامك فهلوى يبقى لازم تكون فهلوى أكثر منه !! وأنا ما شفتش لحد دلوقت غير فهلوة في فهلوة !!

الشباب : اذا كانت العملية مجرد فهلوة ما كانش حد غلب !!

علي : آمال انت غلبت ليه ؟ ! ده انت كنت حاتروح فطيس يا ولداه !!

ناجي : (لعلي مداعبا) وانت عندك حل يا معلم ؟ !

علي : أنا كل اللي شفته شغل حوا ٠٠ تقوللي تكنولوجيا ٠٠

تكنولوجيا .. برضه مش حايعيل عليا ..
الحاوي حاوي .. ابن البلد زى الخواجه .. وإذا
كان رزق الهبل ع المجانين .. فكل بلاد الدنيا فيها
الهبل وفيها المجانين .

نساكي : وناوى تعمل ايه ؟ !

عسلى : هي المسرحية اسمها ايه ؟ !

الشباب : اسمها .. « هكذا تكلم على بابا » .

عسلى : هو بسلامته ما قالش غير كلمة السر اللي فتحت
باب المغارة قدامه .. وخلته يلطش كل الجواهر
اللى تعب الحرامية في سرقتها !!

الشباب : (مستكرا برقة متسائلة) ده كلام برضه
يا معلم ؟ !

عسلى : على كل حال .. احنا مش خسرانين حاجة .. اذا
كانت طريقتك مانفعتش .. تبقى طريقتي لو حصلتها
في الخيبة مش حايجري حاجة .. !!

الشباب : (مداعبا اياه) على كل حال نجرب .. ويا بختك
يا ابو بخيت !

عسلى : (للجمهور) خلاص موافقين ؟ !

الجمهور : (همهمة وضحكات) موافقين !! موافقين !!

عسلى : (بصوت حماسي) او كى .. (يمد ذراعيه الى
الستارة وكأنه يقوم بالتعزيم السحري عليها)

(خرخشة في الميكروفون ثم يعود الصوت بنبرة
جهورية ميلودرامية)

الصوت : لقد أعذر من أنذر !!

على : (ملتفتا تجاه الجمهور) ولا أعذر ولا أنذر .. أنا
يا بوى مش حاجي ناحية الستارة ولا حا امسها !!
ده أنا راجل على باب الكريم وحا أقول كلام في
الهوا .. لا يودى ولا يجيب .. ومين عارف ؟ !
يمكن يجيب !! يوضح سره في اضعف خلقه ..
أما بقى اذا كنت سيادتك خايف من الكلمتين اللي
حا أقولهم .. يبقى أنا سرى باتع وأنا مش دريان !!

الصوت : (بنفس النبرة) لقد أعذر من أنذر .

على : برضه ولو (يلتفت ليواجه الستار ماذا ذراعيه
بحركات التعزيم السجري ثم يصيح بصوت قوى)
افتح يا سمسم !!

(أضواء مترقصة بكل الألوان على الستار وهدير
موسيقى كالرعد بحيث يثر الرعب داخل على الذى
يلوذ رعبا بجوار الشاب وناجي ، وهو يتحسس
جسمه بيديه لعل شيئا يكون قد وقع له دون أن
يدرى . ثم صوت دقات مثل الدقات التى كانت
مغارة على بابا تفتح عليها . وبالفعل يبدأ الستار في
التحرك ببطئا ثم سريعا الى أن ينفتح تماما ويكشف
عن كل ما فى المنصة .. وعلى فى نشوته يرقص مثل
أولاد البلد وهو يصيح) هيه .. وفتحناها ..
والله وفتحنا عكا .. الركب ع النية .. أصل أنا

راجل طيب وابن حلال (يواصل الرقص دون أن
ينظر الى ما بداخل المنصة)

الشباب : (ناظرا الى عمق المنصة في ذهول ومع خفوت
الموسيقى وتوقف الأضواء عن الدوران يصرخ صائعا)
مش معقول (يتردد صدى صوته في جنبات المنصة
الغاوية تماما) كانت وهم في وهم (يتردد صدى
صوته) .

ناجي : (يدور مذهولا في المنصة) فراغ في فراغ في فراغ !!
نهلة : (صائجة عليه من البثوار) انزل يا ناجي .. احسن
يجراك حاجة ؟ !

ناجي : (صائعا بصوت اعلى) بياض في بياض في بياض ..
مافيش غير حيطان وأرضية مدهونة أبيض في
أبيض .. آمال كل الهبة دي كانت على إيه ؟ !
الشباب : (يقف في منتصف المنصة متجدبا) آمال فين الصوت
اللى كان بيصبرنا كل شوية ؟ ! يعنى اتكتم !!
خايف م الحساب ؟ !

(ناجي يختفى في أحد الأبواب الجانبية . ينظر الشباب
فلا يجده فيصيح مناديا عليه) انت رحت فين ؟ !
تعالى هنا .. أحسن يكون فيه ملعوب تاني ؟ !

ناجي : (بصوت من بعيد) المصيبة انه مافيش حاجة
خالص .. خواء في خواء .. حا أفتش الكواليس ..
وحا أشوف مكاتب الادارة المسرحية .. دي لحظة
مش ممكن تفوتني !

نهضة : (تقفز من على سور البنوار صائجة بدورها)
وأنا جاية وراك .. العمر واحد والرب واحد

(تصعد المنصة وتختفي داخل الباب الذى اختفى فيه ناجى)

على : (صائجا فى نشوة) أنا اللي فتحتها .. أنا اللي فتحتها ..
فتحتها .. (يدور راقصا بين جنبات المنصة مقلدا على بابا فى الفارة وهو يصبح مرددا) ذهب ...
دددهب .. فضة ف .. ف .. فضة .. ياقوت ..
يا .. يا .. ياقوت .. مرجان .. مر .. مر ..
مرجان (يركع على الأرض وعيناه الى أعلى) ..
أشكرك يارب .. (ينهض ويختفى داخل أحد الأبواب الجانبية) .

الشباب : (وسط المنصة يصبح) اطلع لى هنا اذا كنت راجل ؟ .. ورينا وشك اذا كنت قد الكلام اللي بتقوله !! (ينظر أعلى المسرح ويدور ببصره فى كل أركانه) يعنى اتكلمت ؟ ! طبعا انكشفت ؟ ! لكن مش حا اعتقك !! كنت عاوز تخنقنى ؟ ! وانت اللي تستاهل الخنق !! (يصمت ويواصل الدوران فى أرجاء المنصة مرهقا السمع)

(صوت خرخشة فى الميكروفون ويعود الصوت الجهورى ولكن بنبرة توحى بالضعف والتردد والاهتزاز لأول مرة)

الصوت : بشرى سيداتى .. ساداتى .. لقد خضتم معنا أعظم تجربة وأروع انجاز فى تاريخ المسرح العالمى

أجمع .. فطالما سعى رواد المسرح وأعلامه منذ عهد
الاغريق الى ادماج المنصة بالقاعة حتى يتفاعل
الجمهور مع الممثلين بحيث لا يقتصر دوره على
الفرجة .. لكن جاءت كل محاولاتهم بالفشل حتى
الآن .. فمنهم من هبط بالممثلين الى قاعة المسرح
كى يلعبوا ادوارهم وسط الجمهور .. ومنهم من
صعد بالممثلين من وسط الجمهور الى المنصة ..
ومنهم من اجلس بعض الممثلين في مقاعد الجمهور حتى
يوحى اليه بأنهم جزء لا يتجزأ من العرض
المسرحي .. لكن في كل هذه الحالات وغيرها
ظل الجمهور متفرجين والممثلون مؤدين ..
ولم يحدث أى امتزاج حقيقى بين المنصة والقاعة
او بين الخشبة والصالة .. ولذلك فمسيريتنا
الليلة مسرحية تاريخية بمعنى الكلمة .. لا أقصد
أن أحداثها مستقاة من التاريخ ولكن أقصد أن
المسرح العالمى سيؤرخ بها .. فهى ليست أول
مسرحية تدمج المنصة بالصالة بعد صراع رهيب
فحسب ، بل أول مسرحية في التاريخ تقدم بلا ممثلين
ولا ديكور ولا نص ولا ملابس ولا اضاءة ولا حتى
ادارة مسرحية .. وهى أول مسرحية يتحول فيها
الستار الى بطل حقيقى بعد أن كان مجرد حاجز
وهى يوحى بوجود ما يسمى بالحائط الرابع بين
الممثلين والمتفرجين .. بل انها أول مسرحية يقوم
بأدوارها الجمهور دون اتفاق سابق بل ودون أن
يدروا أنهم يشلون بالفعل .. فقد زالت الحدود

والجواجز بين الوهم والحقيقة .. وهذا في اعتقادي
سابقة لم تحدث ولا حقة لن تحدث .. لأنكم من الآن
فصاعدا لن تعرفوا الوهم من الحقيقة .. فما أمتع
أن يتحول الوهم الى حقيقة والحقيقة الى وهم .

(يعود ناجي ونهلة وعلى من الأبواب التي اختفوا
فيها ويلتفون حول الشاب الذي لا يزال ينصت
للصوت الذي صمت أخيرا)

ناجي : مالفيناش حاجة أبدا .. كل شيء مدهون أبيض في
أبيض .. المكاتب فاضية .. والأود فاضية ..
زى ما تكون ما شافتش ناس قبل كده !!

الصوت : (بصوت أقل ترددا وضعفا واهتزازا) وشهد
شاهد من أهلها .. حتى تصدقوني وتؤمنوا بصدق
كل كلمة نطقها من أول العرض .

الشاب : كل موقف عاوز تحوله لصالحك .. لكن النوبة دى
مش حا أعتقك .. مش معقول نسيبك تصب السم
نقطة نقطة في ودانا بالشكل الخبيث والبطيء ده ..
عموما أنا جايالك .

(يهبط من المنصة مسرعا لكن ناجي وعلى يمسان
به ويمنعانه للحظات)

ناجي : على فين ؟ ! أوعى تعرض حياتك للخطر مرة ثانية ؟
على : الحكاية خلصت .. فتحنا الستارة وعرفنا اللي
وراها !!

الشاب : (لناجي وعلى) يعنى أنتم أشجع منى ؟ ! مش
معقول !!

على : اوعى تصور قتيل !! حياتك أغلى من أى حاجة !!

الشباب : ماتخافش .. أنا عاقل قوى !!

ناجى : (يتغلى عن الإمساك به قائلا لعلى) خلاص ..
سيبه (للشباب) ربنا معاك .

**(الشاب يهبط من على المنصة وينطلق خارجا من
الباب الخلفى للقاعة وسط تصفيق الجمهور
الحاد)**

المصوت : (عاليا نائحا) ارجع يا مجنون .. لقد أعذر من
أنذر .. ارجع .. ارجع .. اننى خائف عليك ..
فسوف يحدث لك أسوأ ما حدث لك بين طرفي
الستار .. كن حكيما مثل رشيد الساكت الذى
ذهب لتكوين صداقة وطيدة مع كبير الخبراء ..
ويا بخت من نفع واستنفع .. (ينظر ناجى الى نهلة
ويتبادلان نظرات ضاحكة ساخرة) .. أو كن حكيما
مثل نجم بك الذى ذهب لمباركة صفقة بملايين
الجنبيها .. انك لن تجنى شيئا مما يدور فى مخك ..
لن تجنى سوى الخسارة والضياع وربما الموت ..
هل يمكن أن تضيع عمرك من أجل ستار لم يفتح
أو فتح ؟ ! فليذهب الستار كله بل والمسرح كله
الى الجحيم .. لتظل أنت بثوريتك المتفجرة زينة
للشباب ونبراسا لهم .. (ثم فجأة بصوت متشنج)
ارجع يا مجنون .. ارجع أنا فى عرضك .. أرجوك ..
ليست هناك أية خصومة بينى وبينك تستدعى

كل هذا الصراع .. ارفع مصلحتك ومستقبلك ..
فأنت لا تزال شابا والمستقبل أمامك عريض طويل .

صوت الشاب : (مقاطعا) المسألة مش تار شخصي .. المسألة
قضية قومية ومصيرية لابد أن تحسم !!

الصوت : انت اعتدت استخدام الألفاظ الضخمة والشعارات
الرنانة التي لا تدرك معناها ولا تعي خطورتها !!

(أصوات تكسير وتدمير وصراخ واستغاثات صارخة
بلا كلمات مفهومة . والمسرح يطفأ وينار عدة مرات
بالوان مختلفة .. وناجي ونهلة وعلى لا يزالون
واقفين على المنصة ذاهلين)

على : (ناظرا حوله في رعب) يا .. دى بقى فيها قتل
وجناية وسين وجيم وشهود وتعالى وروح ..
لا يا عم أنا مش حمل الكلام ده (ينظر حوله في خوف
ثم يهبط من على المنصة جاريا الى خارج المسرح
وخلفه شويكار التي تقفز من على سور البنيوار)

شويكار : وأنا وراك .. هو أنا حا أسيبك بعد اللي شفته
الليلة .

(تجرى خلفه وتختفى في نفس الاتجاه)

(تخفت أصوات التدمير والاستغاثات والأصواء
المتقلبة)

(همهمة وضجيج من الجمهور)

نهلة : (لناجي) أنا خايفة يا ناجي (تلتصق به) .

ناجى : (يربت على كتفها فى حنان) اطمنى .. كل شىء
حايضج حالا .. وأنا مستعد أشهد على كل اللى
حصل فى ليلة العجايب دى !

نهلة : ما بلاش الشهادة دى .. يمكن تجيبك وجع
دماغ !!

ناجى : مش أنا اللى أتخلى عنه يا نهلة !! ده راجل بيحارب
معركتنا !! مش كفاية مارحتش معاه !

(الاستغاثات تخفت تدريجيا وتحول الى نوع من
الشهيق والزفير ثم الشخير الذى يتضاءل الى أن
يصمت تماما فى النهاية ، ومعه تخفت الاضاء
أيضا)

نهلة : يعنى مارجعش ؟ !

ناجى : ممكن يكونوا قبضوا عليه ؟ !

نهلة : وممكن يكون هو اللى اتقتل ؟ !

ناجى : وممكن يكون هرب من بره بره ؟ !

نهلة : خسارة .. ودى نفسه فى دامية بدون داعى !!

(يظهر الشاب فى خلفية الصالة وبقعة ضوء تسلط
عليه وهو يسير فى الممر الذى يفصل بين المقاعد
فى الصالة ، نحو المنصة ويقول وهو يصعد فوقها
وقد تمزقت ملابسه وبتت بعض البقع الدموية على
وجهه وذراعيه)

الشاب : ماتخافوش (يلتفت ناجى ونهلة اليه فى جزع وهلع
برغم الهدوء الشديد البادى عليه) أنا مش ممكن

أهرب .. وكمان مش ممكن أقتل لأن اللي بيحارب
بالفكر مالوش سلاح غير الفكر .

نهلة : آمال إيه أصوات التكسير والتدمير والصراخ دى ؟ !
وايه الدم اللي على وشك وايديك ده ؟ ! وهدومك
المقطعة دى ؟ !

الشباب : مش حاصدقنى اللي شفته !!

ناجى : احنا عارفين انك مش ممكن تكذب !!

الشباب : الحقيقة أنا طول المسرحية الوهمية كنت محتار ..
متين جاي الصوت ده ؟ ! فين الراجل اللي بيعمل
الصوت ده ؟ ! وفضلت مركز ودانى لحد ما عرفت
مصدره .. لكن صبرت عشان أشوف آخرتها
إيه ؟ ! .. ولما لقيت الستارة اتفتحت بكلمة
السر « افتح يا سمسم » .. حسيت ان التكنولوجيا
اللى بيتكلم عليها الصوت هى مجرد وهم بيضحك
بيه علينا .. لكنه مع الخبراء خلوا الجو مشحون
بحساسية غريبة بحيث أى واحد يناقشهم فى آرائهم
يبقى عدو للتكنولوجيا والتقدم .. وأظنكم سمعتم
كبير الخبراء الأجانب وهو بيقول لازم نطبط تيارنا
على تيارهم !!

نهلة : (بمثنى الشوق) لكن أنت لسه ماقلتناش إيه
اللى حصل لما طلعت فوق ؟ ! (موسيقى « هكذا
تكلم زارادشت » فى الخلفية)

الشباب : بعد تحديد مصدر الصوت طلعت على طول لحد
ما وصلت لأودة صغيرة فوق سطح المسرح .. زقت

الباب لقيتها ضلمة خالص .. خرجت أبص حواليتها
لقيت فوقها دش كبير للإرسال التليفزيونى .. اللى
منه دلوقت آلاف فوق العمارات والبيوت .. ونازل
من الدش أسلاك تخينة ورفيعة خارمة حيطان
الأودة الصغيرة وداخله فيها .. قلت أكيد الأودة
دى مليانة بلاوى .. رجعت للباب الموارب وولعت
عود كبريت .. لقيت زى دراع حديد راحت ضاربانى
فى وشى .. وقعت ع الأرض وعود الكبريت اطفى ..
قلت لنفسى ده مش وقت اغماء ولا غيبوبة .. قمت
اتجسس طريقى فى الضلمة ووقفت على باب
الأودة .. عشان الدراع الحديد ما تطنينش ..
ولعت عود كبريت ولقيت العجب .. لقيت انسان
آلى ايده الحديد رايحة جاية بمنتهى القوة والعنف ..
حمدت ربنا ان الخبطة ما خلصتتش عليا ..
يدوبك عورتنى فى وشى ودراعاتى وقطعتلى
قميصى .. كان كل تفكيرى ازاي أبطل حركة الانسان
الآلى المتوحش ده !! ولعت عود كبريت تانى عشان
أدور على القيشة ولا البطارية اللى مشغلاه ..
ماعرفتش .. كان شكله معقد جدا وكله أزرار
ومفاتيح .. بصيت فى الأودة لقيت علبة من المعدن
الثقيل .. الظاهر بيغطوا بيها وش الانسان الآلى
لما يبطل شغل .. مسكت العلبة ووطيت تحت
الدراع اللى رايحة جاية ونزلت ضرب بيها على كل
الزراير اللى بقت تنور أحمر وأخضر وكل الألوان ..
وتعمل أصوات عجيبة ومخيفة .. وشميت ريحة
شياط .. خفت أحسن المسرح يتحرق .. لكن

الحمد لله .. الريحه راحت .. والدراع الحديد
بطلت تروح وتيجي .. الأنوار اطفئت .. والأصوات
سكتت .. حسيت ان الانسان الآلى بقى حته حديد
خرده .. لكن الشئ المذهل ان الصوت كان لسه
بيطن فى ودانى .. وافتكرتة لما بشرنا بأن دى
اول مسرحية تتعمل من غير نص خالص .. اكتشفت
فى اللحظة دى ان فيه نص جاى م الدش .. نص
مش مكتوب لكنه مرئى ومسموع .. عشان نؤديه
بحذافيره من غير ما ندرى .. والانسان الآلى عمال
يضحك علينا .. لكن لما أدركت الحقيقة دى ..
الصوت راح خالص من ودانى .. يعنى الصوت
اللى سمعناه ده كلنا .. ماكانش صادر من
الميكروفون بقدر ما هو صادر من داخلنا احنا ..
لأن المهم مش ايه اللى بنسمعه .. المهم هو اللى
بنحب نسمعه ويتمشى مع ميولنا ورغباتنا ..
وخصوصا ان احنا اتعودنا ع التلقين .. لكن الابتكار
والتجديد مالناش دعوة بيه .. حتى التكنولوجيا
اتحولت عندنا لشعار .. واى واحد يناقش مضمون
الشعار ده يتهم فوراً بأنه عدو التكنولوجيا
والتقدم .. وأهم درس استفدناه الليلة دى ان احنا
مانقش قدام شعار مالوش مضمون فعلى فى
حياتنا .. ومانقش قدام ستارة صاحبها بيع لينا
الوهم وراها .. مافيش كلمة سر سحرية فى حياتنا
لو عرفناها نعمل بيها المعجزات .. مافيش « افتح
يا سمسم » .. ولا شعير .. ولا فول .. ولا درة ..
ما بقاش فيه غير « افتح يا عقل » .. افتح يا مغ ..

افتح يا قلب .. ما بقاش فيه غير تشغيل ده (يشب
بسببته الى راسه) وغير عرق ده (يمسح جبينه
باصابعه كما لو كان يتصبب عرقا) .. انا مش
حا أطول عليكم أكثر من كده .. لأنكم حاتصبحوا
بدري بكرة عشان اشغالكم ويومكم الجديد .

ناجى : انا شخصيا من بكرة مش حا أسمح لأى حد بأنه
يتلاعب بأفكارى وعواطفى .. حا اضحك لما احب
اضحك .. وحا أزعج لما قلبى يشعر بحزن
حقيقى !!

نهلة : عشان المستخسختايزر ولا المبكاتايزر .. اهانة
لروح التكنولوجيا نفسها وجوهر الانسان
الحقيقى !!

الشاب : واذا حد فيكم سمع الصوت اياه .. يفكر بس
التجربة اللى مرينا بيها سوا .. حا يلاقيه يتلاشى
على طول .

ناجى : ومش حا يسمع غير صوت كيانه الحقيقى .

{	الشاب :
	ناجى :
	نهلة :

(تخفت دائرة الضوء الالامعة المبهرة على الشاب
وناجى ونهلة فى حين يشرع الستار فى الانغلاق مع
موسيقى « هكذا تكلم زرادشت » لريتشارد
شتراوس)

الختام

1. The first part of the document discusses the importance of maintaining accurate records of all transactions and the role of the accounting department in ensuring the integrity of the financial statements. It also highlights the need for regular audits and the importance of transparency in financial reporting.

2. The second part of the document focuses on the implementation of internal controls to prevent fraud and ensure the accuracy of financial data. It outlines the key components of a robust internal control system, including segregation of duties, authorization procedures, and regular monitoring and evaluation.

3. The third part of the document addresses the challenges faced by organizations in managing their financial resources effectively. It discusses the importance of budgeting, forecasting, and cost management, and provides practical advice on how to overcome common financial management challenges.

4. The fourth part of the document explores the role of technology in modern accounting and finance. It discusses the benefits of using accounting software and the importance of staying up-to-date with the latest technological advancements in the field.

5. The fifth part of the document concludes by emphasizing the importance of continuous learning and professional development for accounting and finance professionals. It encourages individuals to stay current in their knowledge and skills to ensure they are equipped to handle the evolving demands of the industry.

صدر من هذه السلسلة

١٩٨٦

- الانسان يصعد من جديد ،
لا تسدلو الستار ، الحقيقة
عارية جدا
 - بشير الحافى يخرج من
الجحيم
 - الثلاث ورقات
 - ثم يخضر الشجر . (ثلاث
مسرحيات شعرية)
 - حكم شهرزاد
 - الرجل الذى اكل الوزه
 - الكداب ومسرحيات اخرى
 - محاكمة رجل مجهول
- عزت الأمير
عبد الففار مكاوى
رافت الدويرى
عبده بدوى
عزت الأمير
جمال عبد المقصود
رشاد رشدى
عز الدين اسماعيل

١٩٨٧

- ابو نضارة
 - الاجلاف ينصبون المشائق
 - الاوله آه
- محمد ابو العلا السلايمونى
عبد اللطيف درباله
محمد الباجى

١٠١

(على بابا)

● الأيام الصعبة	● سعد مكاوى
● سقراط فى المدينة	● حامد ابراهيم
● المرائس	● صلاح عبد السيد
● المعطش ، عروس الجنوب	● عادل موسى
● غريب فى بلبيس ، أبو زيد	● عادل موسى
● فارس بنى هلال	● محمد سالم
● اللص ، العيد وراء الكواليس،	● مهدى بندق
● تحويدة العمر	● يسرى الجندى
● ليلة زفاف الكفرا	● صلاح المعداوى
● ما حدث لليهودى النائه	● محمد قطب عبد العال
● الجنون والحب	
● المدار	

١٩٨٨

● الأبناء	● احمد سخسوخ
● احتفالية بنى شعب	● امين بكير
● الأرائب	● لطفى الخولى
● ازمة شرف	● ليلى عبد الباسط
● بروفة للجريمة	● محمد سالم
● الجزء ، الزفاف ومسرحيات	● صلاح راتب
● أخرى	● سوريال عبد الملك
● جمال الصيف	

أحمد شمس الدين الحجاجي

أنس داود

جمال عبد المقصود

فتحي سلامة

أحمد الطاهر

سمير عبد الباقي

ناهد نائلة نجيب

مصطفى أبو النصر

سعد زهران

نسليم مجلى

محمود نسيم

إيلي عبد الباسط

فتحية العسال

صلاح راتب

محمود أبو دومة

عبد اللطيف درباله

عبد الجبار أبو غربية

سعد مكاوى

نهاد شريف

فاطمة السيد

الخماسين

الصيد

عالم كورة كورة

عشرة على باب الوزير

الفئران

فلح وسلاطين

كليلة ودمية وبعد

المبعوث

المنفقون أو آخر الأجيال

الجنونة

مرعى الفزلان

ورق ٠٠ ورق ، نهن الفرية

١٩٨٩

البين بين

ثلاث مسرحيات كوميدية

(الهيرة ، عيسىوة مساركة

مسجلة ، شقة مفروشة)

جاءوا الينا غرقى

الخروج ومسرحيات أخرى

من الجنون أو غرفة رقم ٧

الهدية

١٩٩٠

أحزان السيد مكرر

أحلام السنين

● البحر	انس داود
● حتى صاح الديك	امين بكير
● الطلسم ليلة نادرة	امير سلامة
● على ورق الخوخ	فتحي سلامة
● غيلان الدمشقي	مهدى بندق
● كفر التتهيدات	رافقت الدويري
● كله عايز يتجوز صلوحه	ابراهيم حمادة
● ليلة عرس الأقوياء	عبد اللطيف درباله
● المحاكمة	يسرى الجندي
● المزرعة	ابو العلا السلاوني

١٩٩١

● محاكمة الدكتور سيف	حسن سعد
● المكوك	يوسف العاني
٦١ - البترول طلع في بيتنا	على سالم
٦٢ - الآلهة غضبي	بهيج اسماعيل
٦٣ - موضوع ماجدة	يحيى عبد الله
٦٤ - على الزبيب	يسرى الجندي
٦٥ - حلم ليلة حرب	محمد ابو العلا السلاوني
٦٦ - انهم ياكلون الهابورجر ،	
محاكمة زنجي ابيض	بهيج اسماعيل
٦٧ - نرجو الانتباه !	محمد الأرسى
٦٨ - تغريبة مصرية :	
١ - ست الحسن	محمد ابو العلا السلاوني
٦٩ - سقوط اثينا	حامد ابراهيم

٧٠ - بدائع الفهلوان فى وقائع
الأزمان :

- ١ - خيول النيل
٧١ - الجدار ٠٠ والبلاب
٧٢ - ناس التهر
٧٣ - سبىراميس والافصال
٧٤ - الشجرة والصعود الى
الشبس
٧٥ - اولاد الغضب والحب
٧٦ - يا آل عبيس
٧٧ - دكاترة وسباكين
٧٨ - اللعنة من فوق المنبر
٧٩ - الزهرة والجنزير
٨٠ - مات الملك
٨١ - كرسى الحكومة
٨٢ - المقامة الفجرية
٨٣ - الاتوف ومسرحيات
مونودراما اخرى
٨٤ - حفل لتتويج الدهشة
٨٥ - العدو فى غرف النوم
٨٦ - امسية عاشقين
٨٧ - قالت بسمة ،
هواية الاستماع المنفرد
٨٨ - عشاق فوق العادة ،
طائر الفرات الحزين
٨٩ - شكسبير ملكا
- رافت الدويرى
محمد صدقى
حجاج حسن ادول
شوقى عبد الحكيم
وفاء وجدى
كرم التجار
صلاح عبد السيد
عزت الامير
عبد الفنى داود
محمد سلماوى
وليد يوسف
السيد الشوربجى
فاروق اوهان
امين بكير
وليد منير
هشام السلامونى
نعيم عطية
يحيى عبد الله
عبد اللطيف درباله
رافت الدويرى

٩٠ - الفجرى ، بغيفان سليط اللسان	بهيح اسماعيل
٩١ - التماثيل تنتحر	فوزية مهران
٩٢ - العادلون ، الشعلة	محمد سليمان
٩٣ - المليم باريعة	محمد أبو العلا السلاوونى
٩٤ - رجال ومشاعل	حمدي عباس
٩٥ - المخربشين	خيري شلبي
٩٦ - ملك عجوز	شوقي عبد الحكيم
٩٧ - تائسيرة خروج محاكمة المفتي	اسماعيل عقاب
٩٨ - الأراجوز	سليم كتنسر
٩٩ - الوهج ومسرحيات أخرى	د . نادية البنهاوى
١٠٠ - عقول للبيع	فتحي سلامة
١٠١ - مقتل هيباشا الجبيلة	مهدى بندقي
١٠٢ - رحلة طرفة بن العبد الى الموت	أنور جعفر
١٠٣ - الحلم والمؤامرة	محمد صالح الخولانى

تطلب هذه السلسلة من :

- باعة الصحف ● مكتبات الهيئة ● معارض الكتاب بداخل مصر
والخارج
- المعرض الدائم للكتاب ● مكتبات الهيئة المنتقلة بالأحياء والأقاليم

رقم الايداع ١٩٩٦/٩٠٣٩

الترقيم الدولي X — 4925 — 01 — 977 I.S.B.N.

مطابع الهيئة المصرية العامة للكتاب